

EKALESIA FAAPOTOPOTOGA KERISIANO SAMOA

CONGREGATIONAL CHRISTIAN CHURCH SAMOA

**TUSI A'OGA MO AUTALAVOU**

***TEXTBOOK FOR THE YOUTH***

**2023**



**MATAGALUEGA O A'OA'OGA KERISIANO DEPARTMENT OF  
CHRISTIAN EDUCATION**

EKALESIA FAAPOTOPOTOGA KERISIANO SAMOA

*CONGREGATIONAL CHRISTIAN CHURCH SAMOA*

TUSI A'OGA MO AUTALAVOU

*TEXTBOOK FOR THE YOUTH*

**2023**



MATAGALUEGA O A'OA'OGA KERISIANO *DEPARTMENT OF CHRISTIAN  
EDUCATION*

## **UPU TOMUA**

E mua'i faatalofa ma faafeiloai atu i le paia tele o le Eklesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Eklesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Eklesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a moomia.

2. O Mataupu o Tusi Aoga Aso Sa ma Autalavou 2023, ua maua lea i le upega Tafailagi (website) a le EFKS; [www.cccs.org.ws](http://www.cccs.org.ws). Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalamama i ai, i le telefono 24340, po o le [e-meli-extneduc@cccs.org.ws](mailto:e-meli-extneduc@cccs.org.ws).
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaieu. Peitai o vaega masani nei e tatau lava ona fai i Mataupu o Aso Sa taitasi. Ua tuuina atu i Tusi Aoga Aso Sa a le Vasega Amata, Vasega Laiti, ma le Vasega Feololo, fati o pese (nota) fou mo nisi o mataupu.
4. Mo le silafia e Tamā o le Eklesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu īā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasi o i luga, pe lafo mai i le Pusa meli 163, Apia.

6. Ua saunia le Tusi Aoga mo le Autalavou Matutua e le susuga ia Isamaeli Aula'i FS, Keresoma Seuala AM ma Luulau Taulagi AM.

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia  
O la outou auauna

*Maseifua Taniesu*  
**(Faatonu A'oa'oga Kerisiano)**

## FAASOLOGA O MATAUPU MO ASO SA TAITASI 2023.

### IANUARI

29 Tuana'i, Taimi nei, Lumanai - Efeso 17- 32

### FEPUARI

5	Ofutau O le Kerisiano	-	Efeso 6:10-20
12	O le a le uiga o le alofa	-	1 Korinito 13:1-7
19	Tino & Agaga	-	Kalatia 5:16 - 26
26	Masalosaloga	-	Efeso 6 : 13

### MATI

5	Afai o le Atua alofa, aisea ua tele ai mafatiaga i le lalolagi	-	Faatatalanoaga
12	Toilalo/Faiaina	-	Mataupu Suesue
19	Faafitia ia te ia lava	-	Mareko 8:31-37
26	O le faailoga o le iuga ua oo mai	-	Mataio 16:1-4,24:3-8

### APERILA

2	Asini a le Alii	-	Mataio 21:5
9	Toetu o Iesu i le molimau a Luka	-	Luka 24:1 - 12
16	Aua le ola faafoliga	-	2Nofoaiga Tupu 15:1-15
23	Ia sa'o lau faamuamua	-	Luka 11:37-44
30	O oe o le vine soreka a le Atua	-	Isaia 5:1-9

### ME

7	Liliuina	-	Galuega 16:16 - 35
14	O le Tina ola magafagafa (Aso Sa Tinā)	-	2 Tupu 4: 8 – 17
21	FONO TELE	-	
28	O le Tala lelei ma suiga fou	-	Mareko 2: 21 - 22

### IUNI

4	O foliga o le Atua i le Feagaiga Tuai	Suesuega i le Tusi Paia	
11	Manatua le uluai alofa	-	Fa'aaliga 2:1 - 7
18	Alofa e faavae i le loto mama	-	1Timoteo 1:1 - 11
25	Faaleleiga	-	Mataupu Suesue

### IULAI

2	O le leo le lagona o Tamaitai	-	Kenese 29:15 - 31
9	Ala i le pule o le tautua	-	Mataupu suesue
16	Miti i le lumanai manuia	-	Isaia 2:2 - 5
23	Faalogo ma lagona	-	Luka 8:4 - 21
30	Faamaoni i mea itiiti	-	Mataio 25: 19 - 21

### AUKUSO

6	Aganuu	-	Folafolaga o mea taumafa
13	Naseri a le Atua (Aso Sa Tamā)	-	Faamasino 13:1-5
20	Tama Saili malō	-	Luka 19 :1 - 10
27	Taaloga Matemate i le Tusi Paia	-	Fesili & Tali

## SETEMA

- |    |                                    |   |                 |
|----|------------------------------------|---|-----------------|
| 3  | Tautiga i le Tala Lelei            | - | 1 Tesalonia 1   |
| 10 | Valaauna                           | - | Luka 5:1 - 11   |
| 17 | Fa'aali mai e le lagi              | - | Salamo 19       |
| 24 | Malo o le Atua/Matitiva i le agaga | - | Mataio 5: 1 - 3 |

## OKETOPA

- |    |                            |   |                   |
|----|----------------------------|---|-------------------|
| 1  | Tapenaga Lotu Tamaiti      |   |                   |
| 8  | LOTU TAMAITI               |   |                   |
| 15 | Malologa o le Lotu Tamaiti |   |                   |
| 22 | Lagona popole              | - | Mataio 6: 25 - 34 |
| 29 | Suesuega i le Tusi o Iosua | - | Mataupu Suesue    |

## NOVEMA

- |    |   |   |                    |
|----|---|---|--------------------|
| 5  | Tamafai a le Atua/Filifiliga o Isaraelu         | - | Roma 9:1 - 13      |
| 12 | Faatosina Le Tamaoaiga                          | - | 1 Timoteo 6:1 - 10 |
| 22 | E i ai le faamoemoe o le Atua mo so o se tagata | - | Kenese 21:8 - 21   |
| 29 | E aoga le Telefoni i fanau                      | - | Faafinauga         |

## TESEMA

- |    |   |   |                  |
|----|---|---|------------------|
| 3  | O le mea e te fuaina atu e toe fuaina mai | - | Galuega 5:1 - 11 |
| 10 | O Maria le Taupou                         | - | Mataio 1:18 - 23 |

**ASO SA:** **31 JANUARI 2023**

**MATAUPU:** **TUANAI, TAIMI NEI, LUMANAI**  
*(Past, present, future)*

**Tusi Faitau:** Efeso 4:17-32

### **FESOASOANI MO LE TAITAI:**

O le valaau a Paulo i le Eklesia i Efeso, ia tu'ulafoai a latou tu ma aga sa masani ai i latou anamua, ae ia o mai i le malamalama o Keriso. O le tu'ualalo a Paulo, ina ia tausi le filemu ma le fealofani. E le gata o le va o le isi Kerisiano ma le isi Kerisano, ae faapea foi ma tagata Iutaia o lo o tā mau pea i latou i tulafono a Mose i le Feagaiga Tuai.

I le Efeso 4:17-32, peiseai ua faata'oto mai e Paulo o se fuafuaga faaleagaga (spiritual evaluation plan) mo le agai i luma. O le ala lea i le toe tepa i tua ma vaavaai i tu ma aga faanu'upo, o le taimi lenei, ma le lumanai.

Silasila ane i le **Efeso 4:17-24; 5:3-4.** Ua ta'ua ma faailoa atu e Paulo i tagata o nuu ese i Efeso (Gentiles), o tu ma aga faapaupau sa o latou masani ai. E pei o le:

- Amioga faa-anamua/amio pi'opi'o (corruption)
- Tuinanau e faasese ai (deluded by lust)
- Upu faatauva'a (Vulgar talks)
- Faita'aga (Fornication)
- Manumanu (Greed)
- O le ita (Anger)

O mea uma nei ua tā'ua i luga, o amioga o le pogisa (behaviour from the power of darkness).

E faamamafa lava e Paulo le sua o tatou mafaufau (minds). Ia avea i tatou ma fanau o le malamalama (children of the light). O le malamalama o Keriso e sulugia ai i tatou. Silasila ane i le **Efeso 4:25-32.** O tulafono ia mo le ola fou ua faailoa atu e Paulo i le Ekalesia i Efeso.

### **E pei o le:**

- Tautalatala faamaoni taitasi (speak the truth to our neighbours).
- A outou ita, 'aua le agasala ai (be angry but do not sin).
- 'Aua le gaoi, ae ia faamaoni e galulue i o outou lava lima (do not steal! But give honestly with their own hands).
- Avatu i e matitiva (give to the needy).
- 'Aua nei tautatala i upu leaga (let no evil talk come out of your mouths).
- 'Aua le faatiga i le Agaga Paia o le Atua (do not grieve of the Holy Spirit of God)

O amio ia o le malamalama (ethical behaviour from the power of light). Ma o le faamalosiau a Paulo, ia tuu loa amio o le pogisa, ae ia ola i le malamalama o Keriso e pei ona ta'ua i luga.

Faatāua e Paulo le amio faa-kerisiano o i tatou uma. I so o se mea tatou te faapotopoto ai. O le loto gatasi ma le tausiga o le filemu, o le finagalo lena o le Atua mo tatou. E aoga le toe tepa i tua ma va'ava'ai i mea leaga sa tutupu lena tausaga i totonu o se mafutaga, auā e fotua'i ai se malamalama fou i le agai luma. O Iesu lava le tali mo tatou uma i le taimi nei, ma a taeao. Jesus is our answer now and the future.

### **Faatinoga o le Mataupu**

#### **1. Faitau atoa le Efeso 4**

2. Tuu le avanoa i le autalavou e faasoa mai po o le a le uiga o le mataupu e 4, faatatau i le autu o lenei aso.
3. Faamalamalama i le autalavou fesoasoani o lo o ta'ua i luga.
4. O le taimi lenei e faasoa ai i le autalavou i nai fesili, mo le agai i luma o le autalavou lenei tausaga.

- Mafaufau po o a ni faafitauli na tutupu i lena tausaga, na taofia ai le fia auauna ma ola ia Keriso.  
*What problems arose last year that kept the desire to serve and live for Christ?*
  - O a ni polokalame faa-Autalavou mo lenei tausaga? *What are some youth programs for this year?*
- .....

**ASO SA:** **5 FEPUARI 2023**

**MATAUPU:** **OFUTAU O LE KERISIANO**  
*(Christian Armor)*

**Tusi Faitau:** Efeso 6:10-20

#### **FESOASOANI MO LE TAITAI:**

O le vaiaso ua tuanai atu sa tatou talanoa ai i le talaaga i le tusi lenei a Paulo i le Eklesia i Efeso. O le faamamafa lava lenei a Paulo – ia suia o tatou mafaufau, ina ia foliga i tatou ia Iesu Keriso. Our spirit (your inner self), connects with the Spirit of the

Lord. It feeds us all spiritual things for our mind (mafaufau/loto), to be like Christ.

Ua tatou se'e mai i le 'Ofu tau o le Kerisiano' i le tusi lava lenei a Paulo ia Efeso. Ua aumai e le aposetolo o Paulo o ofu tau o fitafita Roma. Auā o ofu nei o lo o silasila ai le au Kerisiano, i taimi ao pulea e Roma le lalolagi i ia ona po.

O le ofu fitafita o le faailoga o le fa'amata'u. O le faailoga o le malosi ma le pule, ma le tete'e atu, pe faaitiitia ai le afaina o fitafita, i auupega a o latou fili o lo o faasagatau mai. Ua fa'aaogaina e Paulo o ofu tau nei, o se laei faaleagaga mo le 'au Kerisiano, pe a fesagai ma mea leaga o le lalolagi (Efeso 6:12).

1. **Sulugātiti (Belt)**- O le sulugatiti na sulu ai fitafita Roma, aemaise lava i latou o lo o ia te ia se tofi maualuga i totonu o le 'autau. E pei o le taitai o le 'au toaselau (*Centurion*), faapea foi ma le Lekeono (*Legionaries*). O le sulugātiti sa fau ina ia gafatia le tauaveina o le pelu ma le tao *javelin*. Afai ua solitulafono se fitafita nei e lua i totonu o le mālō o Roma, ua aveese faamalosia lona sulugatiti. Ma ua faasee ifo i se isi galuega maualalo atu nai lo o lona tofi sa i ai.  
**UA FAATUSA E PAULO I LE FAAMAONI.**

2. **Uififatafata (Breastplate)** – O le ufifatafata mo fitafita Roma e puipui ai le tino. O le faailoga o le fa'aaloalogia ma le viiga. O le faailoga o le pule ma le mana. E malosi lona fausaga. O lona malosi lea, na mafai ai ona fa'aaoga e pei o se nofoa, e mapu ma malolo ai le fitafita. **UA FAATUSA E PAULO I LE AMIOTONU.**

3. **Se'evae (Shoes)** – O le se'evae a le fitafita Roma, sa faia i pa'u o manu ma tutui i fao. E tolu vaega o le se'evae. O le faavae, o le alofivae ma le pito i luga e nonoa i le ivi vae. Ae paga lea, e faigofie ona masae, ona o le mafafia o le fao. Ma e mase'ese'e i luga o mea lamolemole. Ina ua fai le taua i le 70 T.A i le fa'atamaia o le malumalu o Ierusalem, sa i ai se ta'itai o le 'au toaselau a Roma, na se'e i luga o sitepu na fausia i mapu (*marbles*), ma uma ai ma lona ola. **UA FAATUSA E PAULO I LE TALA LELEI O LE FILEMU.**
4. **Talitā (Shield)** – E eseese ituaiga talitā na faaaogaina e fitafita Roma. O fitafita sa puipuia le maota a le tupu o Kaisara Aukuso, o talitā lapotopoto. Ae o Lekeono sa fa'aaogaina talitā fa'atafafā laumiumi, e puipui ai i latou mai ū fanafana a latou fili. O talitā faatafafā, sa fa'aaoga i taimi o le faatulagaina o fitafita i taimi o taua. Aemaise taimi pe a osofai ai o latou fili, e faatulaga i latou e pei o se ata o se laumei. *Shields were used for strategic formation on the battle field like a tortoise.* **UA FAATUSA E PAULO I LE FAATUATUA**
5. **Puloutau (Helmet)** – O le puloutau sa fa'aaogaina ina ia puipui ai le ulu o le fitafita pe a o e tau le taua. O puloutau foi sa faailoga i se ata o se manu po o se upu faa-Roma. Aemaise lava le manu tāua o le malo o Roma – o le Aeto (*Eagle*). E iloa ai po o le a le vaega o lo o e lavea ai i totonu o le 'au tau a Roma. Auā e tele ona vaega. **UA FAATUSA E PAULO I LE FAAOLATAGA**

6. **Pelu (Sword)** – O le pelu sa fa'aaoga e taia ai le fili o lo o faasagatau mai. Ae o le fausaga o le pelu a le fitafita Roma, sa fai i le u'amea (*steel*). O le 'au o le pelu na ta'ai i le pa'u o le manu (*leather*), ina ia mau le u'uina o le pelu. **UA FAATUSA E PAULO I LE UPU A LE ATUA**

### **Faatinoga o le Mataupu**

1. Ia faitau faatasi ma le autalavou le tusi faitau o le mataupu o lenei aso.
2. Vaevae le autalavou i vaega se 6 ma ia tofu uma ma se pepa ma se peni.
3. Ia tofi le vaega e tatau ona galue ai e ala i ofu tau ua faamatala i luga. Se faataitaiga, Group1 – o le puloutau, Group 2 – o le Pelu, etc...
4. Ia tufa i vaega taitasi o faamatalaga o latou mea tau e pei ona faamatala i luga.
5. Ia faitau ma malamalama i ai.
6. Tali mai le fesili lenei:
  - ✓ E tusa ai ma le tala a Paulo e uiga i le ofutau a le Atua. O le a sou oe iloa i le faauigaina i **le itu faaleagaga** o ituaiga ofu tau lena mo le fitafita a Iesu?
7. Toe faapotopoto mai le autalavou ma faasoa mai o latou tali.
8. Ia taofai mai o latou tali ma faasoa. Fai loa ma lou alotelega o lo o ta'ua i lalo.

### **Saunoaga mulimuli a le Taitai**

1. O le **pelu** po o le upu a le Atua, e tatau ona sulu pea i lou sulugatiti i taimi uma. Ia mau le sulugatiti e ala i lou molimau i le moni o afioga a le Atua.

2. Ia fai lou **ufi fatafata** o le amiontu. Ina ia puipui ai oe mai faiga a le tiapolo o lo o taumafai e fasioti lou agaga. O le loto e na te pulea ai le amio. O le mea lea e tāua ai le loto. Ia foliga pei o Iesu.

3. Afai e te talai le Tala Lelei o le filemu, e tatau foi ona e savali ai. Ia e malamalama e tele mea mātuitui i luga o le ala o le ola nei. E le lamolemole luga o le ala i taimi uma. A ita mai, tali ile fiafia. Auā e iloa ai ua e see i luga o **seevae** o le filemu.

4. O le **talitā** o le faatuatua e pupuni ai ū fanafana a le tiapolo o loo fa'asagatau mai. O oe e lalagaina mamanu o le faatuatua. E eseese ituaiga faafitauli e feagai ai ma tatou i aso uma. O lou faatuatua i le Atua, e mafai ai ona fetuunai le tofa, ma toe faatulaga o mea e te iloa e faaletonu, ina ia lelei i le silafaga a le Alii

5. O le **pulou tau** o le faaolataga, ua faatatau lea i lou malamalama (*intellect*) i le faaolataga na saunia e le Keriso manumalo. A oo ina suia o tatou mafaufau ina ia foliga i a Keriso, e atagia i a tatou galuega e fai. E iloa ai foi le ituaiga Atua o lo o tatou tapuai i ai. E iloa ai, o oe o le atalii po o le afafine a le Atua.

6. A leai sau **pelu**, ua e oti. A leai se Upu a le Atua pe a e fetaui ma le leaga, e te ifi ai lava. Ia e u'umau i le Upu a le Atua, e ala i lou faitau ma malamalama i ai. Fai mai le fetalaiga a Iesu i le Mataio e 10:34 – “Aua tou te manatunatu ua ou sau e avatu le filemu i le lalolagi; ou te lei sau e avatu le filemu, a o le pelu....” O lona uiga, e lei sau le Tala Lelei e na o le milimili o lou pā tua. Na sau foi e faasa'o ma taia i e o faia le amioletonu. *The Word of God is the TRUTH.*

.....

**ASO SA:** **12 FEPUARI 2023**

**MATAUPU:** **O LE A LE UIGA O LE ALOFA?**  
( *What does love mean?*)

**Tusi Faitau:** 1 Korinito 13:1-7

### **FESOASOANI MO LE TAITAI:**

E tele ma anoanoa'i lu'itau sa feagai ma Paulo i lana malaga faamisionare, auā le talaiina o le Tala Lelei ia Iesu Keriso i nuuuese. O se tasi o ia aai, o Korinito. O le aai e tamaoaiga lava. Ae o se aai foi e matuā lauiloa i le amio le mamā (*immorality*).

O le taimi tonu foi lea i Korinito, ua amata ona feesesesei lagona o tagata. Ona o nisi e malamalama i gagana faa-Agelu (*speaking in tongues*). O nisi foi e mafai ona faamalolo i e mamai, ma nisi mau meaaalofa mai le Atua. O lea ua fa'aaogaina e tagata i Korinito a latou meaalofa, e iloa ai po o ai e sili atu. Ua fai faatauvaga a latou galuega.

O le faamamafa a Paulo i le Eklesia i Korinito, po o le a lou poto ma lou atamai i Afioa a le Atua, po o le a le tele o au meaalofa ua faasoa mai e le Atua ia te oe, a leai se alofa, e leai ma se aoga o na mea uma. O le manatu o Paulo, o meaalofa uma ua faasoa atu e le Atua i tagata, o meaalofa ina ia fealofani ai le Eklesia pe afai o loo faamuamua le **alofa**.

### **Faatinoga o le Mataupu**

1. Faitau faatasi le tusi faitau o lenei aso ma le autalavou.
2. Tuu le avanoa i le autalavou e faasoa mai po o le a le uiga o le tusi na latou faitauina. Taumafai ina ia tosina mai le

autalavou i le uiga o le alofa i totonu o latou lava lotoifale.  
*O se faataitaiga – totonu o le fale faigaluega, totonu o potu a'oga, ekalesia, totonu o le mafutaga faale-aiga, faale-nuu, etc....*

3. A ma'ea ona faasoa, le uiga o le 'alofa' ma le autalavou, ona faamatala lea o uiga o le alofa e pei ona tusia i lalo mo lau saunoaga mulimuli.

### **Saunoaga mulimuli a le Taitai**

1. **Onosa'i (Patience)** – O le uiga o le onosai o le talia (*acceptance*) so o se mea e tupu i le olaga. Pe lelei, pe leaga, pe faatuai, faatali pea ma le loto tele. ‘Aua nei vave le ita. Ae ia fa’ato’ato’apea mea uma. E le o le faatalitali ma nofonofo. Ae galue fiafia ma ia to'a i le Atua, auā e aumaia lava e Ia le tali o mea uma.
2. **Agamalu (kind)** – O le uiga o le agamalu, o le tagata e lagonaina le mafatiaga o le isi uso a tagata (*sympathy*). E tinoū e taumafai e sue se auala ina ia faamāmā avega lana amo ua mamafa tū.
3. **E le losilosi (not envious)** – O le uiga o le losilosi vale e uiga tutusa ma le loto leaga. O lau vaai atu i le isi ou uso ua tele ana mea, ae itiiti oe. Po o lau vaai atu ia latou meaalofa e sili atu ia oe. Ona tupu ai lea o lou ita, ma oo ai ina faaleaga le isi tagata e ala i upu soona lafo, po o le faasauaina. O le faamamafa foi lea a le Aposetolo o Paulo, ia faia mea uma ma le loto fiafia ma le loto malie. ‘Aua e te vaai fua i le foai po o le fai mea lelei o isi tagata. Ae ia avea i latou ma faataitaiga lelei.

**4. E le mitamita vale (not boastful)** – O le tagata e fai mai lava o ia e malosi. O ia e poto. E leai lava se tasi e sili atu ia te ia. O le tagata e fiafia e tuu i luga lona isu. E uiga tutusa ma le upu faaperetania o le ‘*pride*’. E mimita lava o ia ia te ia.

**5. E le faafefeteina (not arrogant)** – E tutusa lava ma le mitamita vale. O le tagata lea e manatu faatauva'a po o le vaai maulalo i isi tagata. O le tagata foi lea e le talia ni fautauga, e fai lava le mea e loto ai lava o ia. O lona manatu, o ia e malosi nai lo isi tagata.

E le mafai ona tatou iloa le fati o se pese, pe a le usuina le pese. E le mafai ona tatou iloa le uiga o se tusi, pe a le faitauina. E faapena foi le uiga o le alofa. E le mafai ona tatou iloa le uiga o le alofa, pe a le faatino.

Talia nei loa le Alofa Tunoa o le Atua, ma amata ona faatino i totonu o lou lava lotoifale, le alofa o le Atua e mo tagata uma.

.....

**ASO SA:**

**19 FEPUARI 2023**

**MATAUPU:**

**TINO MA LE AGAGA**

*(Flesh vs Spirit)*

**Tusi Faitau:**

Kalatia 5:16-26

### **FESOASOANI MO LE TAITAI:**

O le faafitauli na tupu i le Ekalesia i Kalatia, o a'oa'oga ua amata ona sasao mai e ese mai le Tala Lelei ia Iesu Keriso (**Mataupu 1:6**).

O a ia a'oa'oga? O le feteenaiga o talitonuga i le va o Iutaia ma tagata nuu ese. Aemaise lava o Iutaia ua liliu e fai ma Kerisiano, o lo o tamau pea i latou i tulafono mai le feagaiga tuai. E pei o le peritomeina, ma meaai e faasa ona tausami ai.

O latou fautuaga i tagata nuu ese ua liliu i le talitonuga faa-Kerisiano, e tatau pea ona latou mulimuli i tulafono a Mose – **e tatau ona peritomeina i latou, pe afai ua fia avea ma Kerisiano.**

O le upu a Paulo fai mai – **E le o le tulafono, ae o le ALOFA TUNOA (not by law but the Grace of God).**

O le faamamafa lava lea a le Aposetolo, ia faamalosi le itu faaleagaga, ae le o le itu faaletino e pei ona naunau i ai tagata Kerisiano Iutaia.

### **Faatinoga o le Mataupu -30 mins**

1. Vaevae le Autalavou i ni vaega se 2.
2. O le isi vaega e ta'u - “**O LE ITU FAALE-TINO**”
3. O le isi vaega e ta'u – “**O LE ITU FAALE-AGAGA**”
4. Ia alu le vaega ma ia faatino se tala e uiga i le igoa o latou group. Ia taumafai e faatino mai se tala faanei ona po.
5. A maea le 30mins, ona o mai lea e faaali mai i luma o le taitai o le Autalavou ma le laulau.

### **Saunoaga mulimuli a le Taitai**

E masani lava pe a tatou talanoa e uiga i Fua o le Agaga, o le...**Ia sili atu le alofa, agalelei, loto faamagalo, ma isi.**

O le faafitauli, e le i foafaina i tatou ia ola faapena i lo latou lava malosi. *We were not designed to love by using our human ability and power. ONLY through a Divine power – Jesus Christ.* E na'o

le taimi tatou te feso'ota'i ai ma Iesu, ona tafe mai ai lea o uiga o le – **Fua o le Agaga**. O le mea lena, e manaomia ai Iesu i o tatou olaga.

O la tatou sāvali e tatau ona...**Feso'ota'i pea ia Iesu, ona o'o mai lea o mea lelei i lou olaga.**

Pe a faaleleia la tatou sootaga ma le Atua, o le a sili atu ona tatou alolofa, agalelei, faamagalo ma foliga ia Keriso.

Ia manatua pea le moto tauave a le Autalavou – **IA OLA IA KERISO.**

---

**ASO SA:** **26 FEPUARI 2023**

**MATAUPU:** **MASALOSALOGA**  
*(Doubts)*

**Tusi Faitau:** Efeso 6:13

### **FESOASOANI MO LE TAITAI:**

Ua talafeagai foi le faamatala atu o faafitauli i totonu o le Ekalesia i Efeso ma le mataupu autu o lenei aso. O le talitonuga na sasao mai i le Ekalesia i Efeso, o talitonuga eseese e pei o le *Gnosticism*. O tagata nei, e fiafia e aumaia o tala mai le vavau ma fefilo i ma le Tala Lelei ia Iesu Keriso.

O ituaiga talitonuga faapea, ua amata ai ona masalosalo tagata Kerisiano, pe o mo i lo latou talitonuga ia Iesu. O le taumafai o Paulo, ina ia mausali pea le faatuatua o Kerisiano i Efeso, ma ‘aua nei seetia i latou i tala mai isi talitonuga.

Tuu mai la i a tatou i lenei vaitaimi o le 21 seneturi, o tatou masalosalo ea i lo tatou talitonuga ia Iesu? Ua atamamai tagata i nei ona po. Ua le o toe sailiili tagata i le Tusi Paia, ina ia maua ai le tali o latou faafitauli. Ae ua o i nisi mau suesuega faanei ona po.

E leai se leaga o lena metotia ua faaaogaina. Ae ia tatou manatua lelei, o le faatuatua i a Iesu Keriso, o le faamaoniga lena o lona Alofa i ai tatou. The Christian faith is an assurance that God's love will never forsake us no matter what.

E tatau ona tatou iloa e i ai faaososoga o le olaga. O lona uiga, e tatau foi ona tatou iloa ona talia le natura o le tagata, e masalosalo i tele o taimi. Toatele i tatou o le 'au Kerisiano, e manatu o tatou e leai ni masalosologa. Ona o tagata Kerisiano e toa o latou loto. Ae leai. O tatou foi o tagata. We encounter the many doubts in our lives. And as a Christian, we should not be ashamed of having doubts. E toatele Kerisiano tautaua, na toetoe lava a fati i le olaga, ona o masalosologa i le ola nei ma fesiliglia ai le alofa o le Atua mo latou. Peitai ane, o latou loto tetele ma le faatuatua, na manumalo ai lava.

### **Faatinoga o le Mataupu – Fesili mo le mafaufau**

1. Na i ai se taimi na e masalosalo ai i le lua savaliga ma le Atua? Po o e masalosalo pea i lenei taimi? E faapefea ona e manumalo i ou masalosologa?
  
2. E faafia ona e tautino au masalosologa i ou matua, faifeau po o se isi lava e te faatuatuaina?
  
3. E mafai faapefea e le masalosalo ona fesoasoani ia te oe?

### **Saunoaga mulimuli a le Taitai**

**1. Muamua, ia iloa o le masalosalo e le o se faafitauli o le mafaufau.** ‘Aua nei galo o le masalosalo, o le mea moni o lo o e aafia i se taua faaleagaga ma o lo o i ai se fili o lou agaga o lo o ita tele ia te oe. O le sini o lou fa'aumatiaga lea, ma o ai na te le taofia ona fa'aumatiua oe. O le masalosalo e le na o se mataupu o felafolafoaiga faaleaoaoga po o talanoaga faa-le-atamai; e aofia ai se taua mo lou lava agaga, ma afai e mafai e Satani ona fa'aaoga le masalosalo e taofia ai oe pe faaumatia oe, ona ia faia lea.

**2. Pe a tulai mai ni masalosaloga, ia manatua le sootaga sao i le va o le faatuatua ma le mafaufau.** *Faith and reason.* O nai fesili ina ia e to manatu iai - E faapefea ona ou iloa o lo‘u faatuatua e moni? Pe ou te iloa ea i luga o mafuaaga ma faamaoniga? Pe ou te iloa lona moni e ala i le faatuatua lava ia? Pe o faavae lo‘u faatuatua i le pule, po o luga o le poto masani? E faapefea ona ou iloa o lo‘u faatuatuaga faa-Kerisiano e moni?

**3. Tolu, manatua le vaivai o lo tatou poto, ma o le poto faaletagata e tapula'a.** Faitau le 1 Korinito 1:8. Fai mai Paulo, afai e te manatu ua e atamai tele ua e maua na mafaufau uma e uiga i le Atua, o le mea moni e te le iloa se mea. Ua na o oe o se tagata e fa'atupuina le atamai. I se faatusatusaga, o le tagata o lē e alofa i le Atua o lē ua iloa moni o Ia.

.....

**ASO SA:** **5 MATI 2023**

**MATAUPU:** **AFAI O LE ATUA ALOFA- AISEA UA  
TELE AI MAFATIAGA I LE  
LALOLAGI?**  
*(If God is all loving, why so much  
suffering in the world?)*

**Faatinoga o le Mataupu** – Faatalanoaga

1. Faamolemole faatalanoa le fesili lea i le Autalavou.

**Saunoaga mulimuli a le taitai**

O le Atua foafoa, na te le tuulafoa'iina i tatou. O le Atua o le pule fanua po o le pule i le foafoaga (*landlord*). O le Atua e tumau pea lona faamaoni, lagolagoina, faamanuia, ma ta'ita'ia le foafoaga e tusa ma lona finagalo. **Su'e ma faitau o tusi nei: Ken 9:8-17; Sal 104; Mat: 5:45; Mat 6:26-30.**

E lelei pea ona faamatala atu le ituaiga leaga po o *evil* in the world. **1) Leaga faale-natura Natural evil** – o manu'aga, o le cancer, o faalavelave faafuasei, mafuie, o le mu ma lologa.

O tagata soifua o se vaega o le faatulagaga masani na faavaeina e le Atua *natural order*, ma e pei o foafoaga *creatures*, e pulea i ana tulafono. O le avea ma tagata e gata lona malosi *finite creatures*, e ono oo i tiga, ma'i, faavauvau, toilalo, lē atoatoa, ma le pulapula lagoto o lona soifua, ma le oti.

O le naunautaiga o le tagata e sao mai o ia mai le tele o faafitauli ma mafatiaga uma, ua momoo lava o ia ina ia le fanau mai i le lalolagi. For someone to wish in being immune from all the

sufferings and evil of this world, is to wish that he/she have never been created by God.

**2) Agasala Sinful evil** – O lena ua tatou iloa le ituaiga leaga lea o lo o aliali mai pea i le lotoifale o le tagata – O le agasala. O le agasala e tupu mai lava i totonu o le tagata. O le mata'ua, o le losilosio vale, o le tau faaleaga, o le molimau pepelo, o le fai mea piopio ma le fasioti tagata.

O le galuega a le Atua e sili ona tofotofoina e le moni ma le malosi o le leaga. Ia tatou manatua, o le Atua na te faatagaina le leaga i le lalolagi. Ae le o ia le mafuaaga. God allows evil in the world but he **is not** the cause of evil. It is caused by our own greed for power.

.....

**ASO SA:** **12 MATI 2023**

**MATAUPU:** **TO'ILALO/FAIAINA  
(Failure)**

**FESOASOANI MO LE TAITAI:**

O le faiaina/toilalo i le gagana faaperetania, o le *failure*. O le uiga o lea upu, **o le leai o se manuia lack of success**.

Talitonu na afea le toatele o i tatou i le tele o le mau faia'ina i o tatou olaga. E pei o le gau o se pisinisi; o le lē manuia o se taumafaiga i le a'oga; o le faia'ina o le 'au lakapi. Ma le tele o isi mau faafitauli.

Ae o le faia'ina pito sili ona pauu ai le toatele o tatou, o le faia'ina lea i le agasala. E pei o le fa'aaooga sese o le *social media*; o le *anger*, o le loto leaga *envious*, o le palauvale *swearing*; o le matape'ape'a *greed*, ma nisi amio mataga o lo o i o tatou loto ma mafaufau.

### **Faatinoga o le mataupu – Taliga Fesili ma faasoa le mataupu autu lenei aso.**

1. To'a fia tatou na lagonaina le faia'ina i se mea o lenei olaga? **Sii lima**
  2. O le a le uiga o le faia'ina po o le toilalo ia te oe?
  3. Ta'u mai po o a ni ituaiga faia'ina po o le toilalo o e silafia?
  4. E faapefea ona e tau'aveina le faia'ina? *How can you handle failure?*
  5. O ai ni tagata ta'uta'ua i le tala faasolopito o le lalolagi na matua toilalo pe na faia'ina?
- Se faataitaiga, o Adolf Hitler**
6. Faamatala mai le mafuaaga na latou faia'ina pe na toilalo ai?
  7. E te manatu o le toilalo po o le faia'ina e le maalofia?
  8. O le a se aoga o le toilalo po o le faia'ina i le olaga nei?

### **Saunoaga mulimuli a le Taitai**

Ia tatou manatua, e ese le mea ta'u o le **toilalo o se olaga o le Kerisiano**, ma le **toilalo i le olaga faa-Kerisiano**.

**Toilalo o se olaga a le Kerisiano –** O le toilalo i le olaga o le Kerisiano, o se toilalo e le fesoottai ma manatunatuga faaleagaga. Ua na o se fa'ato'ilaloina o se tagata Kerisiano i mea o le olaga i lea aso ma lea aso. E pei o le le pasi o se suega, o le le ausia o lona

malosi i se tauvaga tamo'e, o le muli o latou va'a i le taaloga o le tuuga fautasi.

**Toilalo i le olaga faa-Kerisiano** - O lona uiga o se toilalo i totonu o sootaga a le tagata talitonu ma lana savaliga ma le Atua. O se Kerisiano ina ua le fiafia i le Atua, ma tapunia ai le faitotoa o le loto ma le agaga e faia le finagalo o le Atua. O le ituaiga toilalo lea, e mafua ona o le agasala. O se faafitauli po o se toilalo faaleagaga *spiritual failure*.

.....

**ASO SA:** **19 MATI 2023**

**MATAUPU:** **FAAFITIA IA TE IA LAVA**  
*(Self-denial)*

**Tusi Faitau :** Mareko 8:31-37

### **FESOASOANI MO LE TAITAI:**

O le faamatalaga o le tala i totonu o Mareko, o tofotofoga o le avea ma so'o moni a Keriso. *Testing of a true discipleship of Jesus*. E le o se mataupu faigofie, auā, o ai se na te mafaia ona faafitia ona lagona, ae talia e amo le Satauro a Keriso?

Ua tatou malamalama o le Satauro o se mea faigata ma le ogaoga lava. E fai o le mamafa, ae o lona taunuuga e le lelei. Na o le tatou vaai ia Iesu ma le mea na oo i ai. O le faafitia e le tagata o ia lava, o loo faamamafaina le aveese po o le *sacrifice* o ona lagona i le 'oa faale-lalolagi *earthly gains*.

O a mea e ta'u o le 'oa faale-lalolagi? O le fai lea o mea o le lalolagi ma o tatou atua. O le naunau i se taavale po o se telefoni

taugata lava; o le tele o le lima u'u i le tupe; o le naunau i le 'ava malosi ma le sikareti; o le naunau i se fale taugata lava; ma le tele o isi mea o lo o momoo ai o tatou loto. Fesili lava le tagata ia īā te ia lava, pe le ua fai ea nei mea ma tupua i o tatou loto? O mea uma nei e fesootai ma faalogona faale-lalolagi. O le naunau o tatou i mea, e tupu ai le matape'ape'a, le loto leaga, ma le amio piopio.

O le avea ma so'o o Iesu, e manaomia le faatoilalo o ia lagona. E tupu ai le alofa, le fealofani, ina ua le manatu ia te ia lava ma ona manaoga. Ae tau'ave le tautiga o isi tagata ma fetagisi faatasi, ma fefaamafanafanaa'i. Faasoa a tatou mea e maua, 'aua le matape'ape'a. E le na o tagata e te masani ai pe aiga foi e faasoa ai lou alofa. Fetalai foi Iesu, ia e alofa i e o ita mai ia te outou.

E le o se galuega faigofie. E te lagonaina le tiga, le fiugofie, le ita ma le faavaivai. Ae o lagona uma nei, o le mamafa o le amoga o le Satauro.

### **Faatinoga o le Mataupu – Taliga Fesili**

1. O le a le uiga o le faafitia o tatou tagata?
2. E faapefea ona a'oa'oina i tatou ina ia faafiti i tatou lagona o le lalolagi?
3. O a ni aafiaga po o *costs* pe afai e te faafitia oe lava ma talia Iesu?

### **Saunoaga mulimuli a le Taitai**

1. E to'atele ua faauiga sese le upu o le 'faafiti.' O le uiga o le faafiti, o le fesili lea ia te oe lava, po o ai o lo o pulea oe.

Po o oe ma lou malosi, ma ou mafaufauga, ma lou poto ma le atamai? Po o le Atua?

2. 'Aua nei manatu oe i a oe lava. Mafaufau ma alofa i isi foi tagata ma latou faafitauli o loo feagai ma latou. *Sacrifice your time for others no matter the circumstances.* Amana'ia ma faatāua lagona ma manatu o isi tagata.
3. O le amo o le Satauro, o le *submission*. O lou sii lima i le Atua i mea uma e te faia. O le usita'ia o tagata maualuluga atu o latou tulaga i le sosaiete. 'Aua e te faasagatau i ai. Ae ia faia mea uma ma le lotomaulalo.

.....

**ASO SA:** **26 MATI 2023**

**MATAUPU:** **O LE FAAILOGA O LE IUGA UA OO MAI**  
*(Sign of the End of Age)*

**TUSI FAITAU:** Mataio 16:1-4; 24:3-8

### **FESOASOANI MO LE TAITAI:**

O le tala masani lava i le 'au faresaio ma le 'au satukaio ina ua latou tofotofoina Iesu. Na latou fai atu ia Iesu, ua mananao i se faailoga mai le lagi.

Ou te talitonu o lo o tutupu pea lenei ituaiga tofotofoga i le Atua i nei aso. Fai mai Iesu, "...O le tupulaga leaga ma le mulilulua ua saili mai se faailoga..." O le fetalaiaga foi lena a Iesu mo tatou i lenei taimi.

O tatou e ofo pe a vaai atu ua maligi mai loimata o le faatagata o Maria. Ua seetia gofie foi tatou i le vaai atu ua i ai le tagata ua ma'osi'osia le tino *stigmata* ma fai mai o le tagata lea o lo o tauaveina puapuaga o Iesu.

O tatou i nei ona po, e fiafia e fai upu faa'ole'ole e faaseseina ai mafaufau o tagata o le Atua. *We are so gullible by what people say and tell you.*

### **Faatinoga o le Mataupu**

1. O a ni vavega po o ni fa'aaliga mai le Atua na faia i lou olaga?
2. E faapefea ona e iloa ni fa'aaliga e mai le Atua? Auā o le tiapolo foi e faasesēina o tatou mafaufau.
3. Aisea e faigata ai ona tatou talitonu i a'oa'oga ma le faaolataga na faia e Iesu Keriso, ae talia gofie tala'ave a tagata ma mea e vaaia i o tatou mata?
4. Aisea ua tatou le vaaia ai ni vavega o lo o ta'ua i le Tusi Paia i nei ona po?

### **Saunoaga mulimuli a le Taitai**

E tele fa'aaliga ma vavega a le Atua mo le tagata. O le tagata lava ia e na te nofo lelei i lalo ma faasolo ona mafaufauga i le alofa o le Atua mo i tatou. E i ai foi nisi faaaliga ma vavega, e tatau ona silasila toto'a i ai. Pe mai le Atua, pe leai?

**Faitau le Galuega 5:33-39.** Fai mai Kamalielu i le saofaiga mamalu o taitai a Iutaia. Afai o le galuega a le au Aposetolo e mai le lalolagi, e leai sona taunuuga lelei. E iuvale le taunuuga. Ae afai

o se mea mai le Atua, e le mafai ona faaumatia, ina nei i'u ane, ua tatou sii le taua i le Atua lava. O le uiga o le faamatalaga, ua tele fa'aaliga ma vavega ua faamatala mai e tagata, o ni perofetaga. Toatele ua fai mai, ua oo mai le iuga o le lalolagi. Ae o lea ua gagana mai le Atua e ala i lana afioga paia, e le iloa e se tagata le taimi e toe afio mai ai Iesu. E mafai ona tatou faitau o mea o lo o tutupu i nei ona po. E pei o le Koviti 19, o le fetaua'i o atunu i Europa e pei o Ukraine ma Russia; o le tafana o tamaiti a'oga i Amerika; ma le tele o isi mea o lo o tutupu i totonu o lenei lalolagi.

Fai mai le fetalaiga a Iesu, "o na mea uma o le amataga o puapuaga." O lona uiga o mea e tutupu, e agai lava i le taimi e toe afio mai ai le Faaola, ae e leai ma se tasi e iloa lea taimi.

E te le mafai ona e iloa le Atua i ou mata faaletagata *human eyes*. Na o mata o le faatuatua e te iloa ai le Atua i lenei lalolagi. *We are now living in the Age of Faith.*

.....

**ASO SA:** **2 APERILA 2023 (Aso Sa Laupama)**

**MATĀ'UPU:** **ASINI A LE ALI'I**

**Tusi Faitau:** Mātaio 21: 5

**FA'ATINOGA O LE MATĀ'UPU:**

1. Vaevae le autalavou i ni vaega se 2 pe'a to'alāiti, ae a to'atele, vaevae i ni vaega se 3.
2. Ia talatalanoa ma fa'asoia i uiga ma le natura o le manu o le asini

3. O le a fo'i se mafaufauga fa'a-matā'upu silisili, na filifilia ai e Iesu lenei manu e ti'eti'e ai?
4. O a ni a'oa'oga ma ni fe'au tāua mo le autalavou, o lo'o atagia mai i uiga o le manu o le asini o lo o latou tā'ua?
5. A ma'ea le taimi fa'atulagaina, ona tula'i lea o se sui o vaega ta'itasi nei, e fa'amatala le latou fa'asoa.

### **FESOASOANI MO LE TA'ITA'I:**

Aisea lava na filifilia ai e Iesu le asini, ae le filifili se isi manu? E mafai ona tali lenei fesili pe afai tatou te malamalama lelei i le natura ma uiga o le asini.

#### **1. O le uiga muamua o le asini, o se manu ave avega mamafa.**

O le asini e ta'ua o se manu ave avega mamafa, (*beast of burden*) tai pei o le solo fanua. E fa'aaogaina tele e tagata auā femalaga'iga i na aso, aemaise lava i Sasa'e Tutotonu. Po o le a lava le mamafa o se avega e tu'u i luga o le asini, e tūtū lelei lava le asini. A o'o fo'i ina alu malaga, e tau la'ala'a lava ma lenei avega mamafa, tusa lava fo'i po o le a le gaoā o le ala, e lē mafai lava ona fa'avaivai le asini.

#### **2. O le isi uiga o le asini, o se manu onosa'i.**

O le mea mautinoa lava, o le asini o se manu e fa'aaogaina tele mo femalaga'iga, aemaise lava le la'uina oni avega mamafa. Po'o le a lava le mūgāla ma tīmuga, po o le a le mālūlū ma le vevela o le toafa, le a'ea'e i mauga ma le ifoifo i vanu, e savalivali lava le asini. Tusa lava po o lagona lona fia'ai ma le fiaiu, e lē mafai lava ona tagi mai.

#### **3. O le isi uiga o le asini, o se manu filēmū.**

O lona filēmū lea, e iloa i lana gaioi, e faifaimālie ma telegese. O se manu e leiloa tau ma isi manu. O le ala faigofie fo'i lea ona osofa'ia e ona fili, auā e maua mai lava e manu fe'ai o lo o tau mo'emo'e lava. O lona uiga filēmū lea, o lo o iloa ai, o se manu e ola e fai ma meaai a isi manu.

#### **AOTELEGA:**

O le uiga la o le fuai'upu e 5 o le Mātaio e 21 e fua i uiga o le asini sa talanoaina, o le Tupu o lo o afio mai i le asini, e lē gata o se Tupu agamalū, a o se Tupu e alu i lalo. E lē o se Tupu fa'amaualuga. Lea lava na iloa i lona soifuaga i le lalolagi, sa inosia, lotoleagaina, tu'ua'ifuaina, ma oo lava ina sauāina, e le'i fa'apea na tali i se upu. Na onosa'i lava, ina ia taunu'u le fa'amoemoe o lona afio mai, ina ia ofo lona ola e fa'aolaina ai tagata agasala.

*Fa'amanatu: Ia iloa e le talavou ona fa'amaualalo o ia ia te ia.*

---

**ASO SA :**

**9 APERILA 2023 (Aso Sa Toe Tu)**

**MATAUPU:**

**TOE TU O IESU I LE MOLIMAU A LUKA**

**Tusi Faitau:**

Luka 24: 1-12

### **FESOASOANI MO LE TA'ITA'I:**

E iloa tele i tusitusiga a Luka le mafaufauga lea o le ***Reversal of the Reversed***. O lona uiga e mimilo e le fe'au a Luka le nātura

māsanī o mea e masanī ai le tagata. Fa'ata'ita'iga: o le tagata mālosi e iu ane ua vaivai; o le tagata mau'oa e iu ane ua mativa; o le maualuga fo'i e iu i le maualalo. O lo o iloa fo'i tele fo'i lea mafaufauga i le fa'amatalaina e Luka o le Toetu manumālō o Iesu.

Atonu e lē fesiligia le usua'i o tinā i le tu'ugamau. O le usu e talitonu i le nātura masanī o mea. O le usu ma le mautinoa, e leai lava se poto na te toe sui le fa'asinomaga o mea ua uma ona fa'ata'oto i le pule a le Atua. O le oti lava ia, o le tu'ugamau lona nofoaga e fa'avavau.

Peita'i o le leo mai le tu'ugamau, '*E le o iinei o ia, a ua tu'* (*fuai'upu e 6,*) *ua iloa ai' e sesē le nofoaga o lo o sa'ili i ai Iesu.* Ua galo ia te i latou lana fetalaiga, '*E tatau ona tu'uina atu o le Atali'i o le tagata i lima o tagata agasala, ma ia fa'asatauroina, ma toe tu mai i le aso tolu.*' (*fuai'upu e 7*). Ua manatu tele tinā i le nātura māsanī o mea, ae ua galo Lē e ona mea uma. Ua avea ma ala ua sesē ai le nofoaga ua latou sa'ililia ai le Fa'aola. Fa'atāua tele e Luka le Mana o le Toe Tu. O le mana na liua le natura māsanī o le ola. O le mana fo'i lea na aveesea Iesu mai le pule a le tu'ugamau. O le Ali'i lava o le Toe Tu. E le i afio mai Iesu e nofonofo i se tu'ugamau pogisa. O le Ali'i Ia o le malamalama.

#### AOTELEGA:

Afai ua lē maua atu Iesu i le tu'ugamau, ai se manaia ae maua atu o lo o ia te oe le talavou. E iloa i le ituaiga olaga o lo'o e ola ai, o au fa'atinoga ma upu e te tautala ai. Ola i le malamalama o le Ali'i o le Toe Tu. O le nofoaga sili e te maua ai Iesu Toe Tu, o lou talavou, pe'afai e suaia oe e le Mana o le Toe Tu.

#### GALUEGA FA'ATINO:

- Fa'atino le tala o le Toe Tu tusa ai ma le molimau a Luka. Fa'atāuaina ai le sesē o le nofoaga na saili ai e tinā le Ali'i Fa'aola.

*Fa'amanatu: O oe o le nofoaga sa'o e tatau ona sa'ili i ai Iesu Keriso.*

---

ASO SA:

**16 APERILA 2023**

MATAUPU:

**'AUA LE OLA FA'AFOLIGA**

Tusi Faitau:

2 Nofoa'iga Tupu 15: 1- 8

#### FESOASOANI MO LE TA'ITA'I:

O le tusi faitau o le tatou matā'upu, o lo o fa'amatalaina ai le fa'afitali o Isara'elu. E lē uma le ola fa'afoliga i le Atua. Ua lē faia tiute e tatau ai mo tagata o le nuu o le Atua. Na ona ta'u o le au-faitaulaga, ae ua lē faia o latou tiute faa-faitaulaga, e tusa ai ma tu ma aga fa'a-faitaulaga e pei ona finagalo ai le Atua. Ua faatino, ae ua fai i o latou lava loto. Ua faia i le va'aiga a tagata, ae ua lē faia mo se viiga o le Atua.

O le ola fa'afoliga lea o lo o atugalu i ai Asaraia le atalii o Oteta, o lē na ia ave le feau ia Asa le tupu o Iuta. Lea la e avatu ai le feau, "*aua le faafoliga le mafuta atu o le tagata i le Atua. 'Aua nei faia ona o le vaaiiga a isi tagata. A ia fai ona o le Atua.*" Ona ua avea le ituaiga ola fa'afoliga lea, ua fa'avaivaia ai le soifua taumafai o isi uso i le Atua.

Lea e fa'amalosi mai ai Oteta ia Asa le tupu o Sā Iutā ma Sā Peniaminā i le fuaiupu e 7: *Ia fa'amalosi outou, 'aua foi tou te lima vaivai; auā e tauia a outou galuega.* Ona faia ai lea e Asa le tupu e pei o valoaga a Oteta. Ua faia o latou tiute, e pei ona finagalo ai le Atua. Ua lē faia ona o le faifai i isi uso-a-Israelu, ae ua faia mo le Atua

#### AOTELEGA:

E le o se mea lelei le ola fa'afoliga. Ne'i o tatou manatu, e lilo. Ae leai se mea e lilo i le Atua. Po o le a sa tatou auaunaga e fai, 'aua nei faia ia fa'amalieina le tagata. E le o lenā le fa'amoemoe o le ola auauna i le Atua. O mea uma tatou te faia e mo le vi'iga o lo tatou Atua.

#### GALUEGA FA'ATINO:

- Fa'amatala le uiga o le upu ola fa'afoliga.
- O a ni ona mafua'aga?
  1. *Ona o le musu i ita mai se isi, ua taumafai ai lava e fai le mea e le o i ai le loto malie.*
  2. *Ona o le fiatauvā i le isi uso-a-tagata, ua taumafai ai lava e fai le mea e lē tatau ai, ma afaina ai.*
  3. *Ona o le le fa'alagolago i le Atua, ae ua fa'alagolago i le tagata.*
- Fa'amatala le ola fa'afoliga o lo o atagia i le tusi faitau, ma fa'amatala uiga o le fe'au i le mea e tatau ona fai.

*Fa'amanatu: Ia fa'amaoni i so o se auaunaga e tatou te faia, ona manuia lea.*

---

**ASO SA:** 23 APERILA 2023

**MATAUPU:** IA SA'O LAU FA'AMUAMUA

**Tusi Faitau:** Luka 11: 37 – 44

#### FESOASOANI MO LE MATĀ'UPU:

I le tusi faitau, o lo o iloa ai le 'ese'ese o le fa'amuamua a le au faresaio (ta'ita'i o le lotu Iutaia), ma le fa'amuamua a Iesu. O le fa'amuamua e fua i le talitonuga i le fa'atinoina o tulafono fa'a-Iutaia, i le ola fa'amamāina ma le ola fa'apa'iaina.

O le talitonuga fa'a-Iutaia i faigā'ai, e tatau lava ona fufulu muamua lima, ona taumafa ai lea. Auā o le faigā'ai, o le taliaina lea e le tagata, o meaalofa foa'ifua mai e le Atua. Peita'i, e le'i fa'atinoina e Iesu. Fai mai Luka, ua ofo ai le faresaio. O le ofo o lo o i ai totonu le taulamalama ma le va'ava'ai masei. Ua va'ai i le tino, ae ua lē va'ai i le loto.

Ae lē gata i lea, ua o'o lava fo'i i mea e ofo mo le Atua (*taulaga*), o lo o iloa ai lava le uiga lea o ia ta'ita'i Iutaia. Ua fa'atusatusa po o ai e telē a'o ai fo'i e la'ititi lana foa'i, ua fua ai le lelei ma le lē lelei o le taulaga.

Lea la e a'oa'o atu ai Iesu, e lē gata i ta'ita'i Iutaia ae fa'apea fo'i i latou uma na i ai, ia sa'o le mea e ave i ai le latou fa'amuamua. E leai se aogā o le fa'amamā o tua o le ipu ma le tānoa, a o totonu e palapalā. E leai se aogā e manaia ai fafo i le va'ai, ae lē lelei le loto. A ia ave le fa'amuamua i le loto, ia avea o se loto mamā e tupu mai ai mea lelei uma. O le fa'amuamua lea o lo o finagalo ai

Iesu, e fua i le loto. A ave le taulaga i le Atua, ave ma le loto malie. O le mea sili lea ona lelei i le silafaga a le Atua, ave ma le fiafia.

#### **FAATINOGA O LE MATAUPU:**

- Fautuaina le vaevae o le autalavou i vaega e lua, ma taumafai e tali le fesili o lo o avatu i lalo.
- **VAEGA 1:** O le a le ‘ese’esega o fa’amuamua a le au faresaio (*ta’ita’i o le lotu Iutaia*), ma le fa’amuamua a Iesu o lo o tā’ua i le fuaiupu 37 i le fuaiupu e 41?
- **VAEGA 2:** O le a le ‘ese’esega o le fa’amuamua a le au faresaio (*ta’ita’i o le lotu Iutaia*), ma le fa’amuamua a Iesu o lo o ta’ua i le fuaiupu 42 i le fuaiupu 44?

#### **AOTELEGA:**

E tofu lava le talavou ia ma le fa’amuamua e lelei. E tāua mea lelei uma na. Pau lava o lea, ia taulāmua ai le fa’alagolago ma le fa’amoemoe i le Atua. Ia taulāmua ai le loto lelei ma loto mamā. E leai lava se isi e maua ai, ua na o le Atua lava. I se isi fa’aupuga, so’o se mea lava tatou te faia ae fa’amuamua le Atua, e mautinoa lava e manuia.

*Fa’amanatu: Fa’amuamua le Atua, ona manuia lea.*

---

**ASO SA:**

**30 APERILA 2023**

**MATAUPU:**

**O OE O LE VINE SOREKA A LE  
ATUA**

**Tusi Faitau:**

Isaia 5: 1-9

#### **FA’ATINOGA O LE MATĀ’UPU:**

1. Vaevae le autalavou i vaega e 2, i ali’i ma tama’ita’i.
2. Mo le vaega a ali’i, fa’amatala le fuaiupu 1 ma le 2. Fa’amatala i lo latou iloa fa’afaifa’ato’aga.
3. Mo le vaega a tama’ita’i, fa’amatala le fuai’upu 3 i le fuai’upu e 7. O le ata fa’ā-fa’atusa mo le nu’u o le Atua.
4. Ona tu’ufa’atasi lea e lau susuga i le Ta’ita’i, ina ia faigofie ona faamalamalama le matā’upu i le fesoasoani ua tapenaina o lo o i lalo ifo.

#### **FESOASOANI MO LE TA’ITA’I:**

O le vine soreka e lē faigofie ona maua i so o se lau’ele’ele, ua na o le vanu lava o Soreka e maua ai. E leai ni ona fatu, ma e susua fo’i i le taumafa. E gaosia mai ai le uaina e na’o tupu ma tagata maualuluga e feinu ai. O lona uiga, o se vine taugata.

O le vine lea o lo o totō i le tōvine o lo o pese ai Isaia. O le tōvine sa galue pūnoua’i ma le fa’amaoni le faifa’ato’aga ina ia fa’ato’ a lelei le ‘ele’ele ae le’i totōina. Fai mai na matuā ‘eli atoa le fanua ma aoao ese uma ma’ā. A o ma’ā ia na fausia ai le ‘olo ma le pa o le fanua. o se fanua lava inā ma’ā ma gaoā. O lona uiga, o se fanua tapena lelei, ae ua totō ai fo’i le vine aupito lelei. Talofa i le faifa’ato’aga, ma lona fa’amoemoega i se selesellega lelei, aepeita’i ua fua mai ai vine leaga.

O le ata manino lea o le nu’u o le Atua i taimi o Isaia. E ese lava le fa’amoemoe o le Atua na osi feagaiga ai, ese olaga o lo o ola ai. Sa fa’afailelei mai e le Atua i le amataga ma le fa’amoemoe e ola e tusa ma lona finagalo, peita’i o se nu’u lava inā soli feagaiga.

O le iuga, fetalai le Atua, tu'u ai pea e ola fa'atasi ma vao leaga. E lē fia taumafa se isi i ona fua. O le a talepe i lalo le pa ma soli e tagata. E lē toe totō fo'i i ai se timu. Le nu'u na tigaina ai le Atua e fa'asa'oloto, a o lea fetu'u e le Atua ona ua fua mai i fua leaga.

### AOTELEGA:

Tupulaga talavou, o outou o vine soreka a le Atua. O le vine filifilia auā se manuia o aiga, nu'u ma le Ekalesia. Sa matuā tapena lelei e le Atua le fanua e toto ai ma le fa'amoemoe ina ia fua mai i fua lelei. E leai lava se mafua'aga o le a fua mai ai i fua leaga. Ae mafua ona fua mai i fua leaga, ona ua tosina gofie mafaufau i le ti'apolo ma ana mailei. 'Aua lava ne'i fetu'u e le Atua lo tatou tovine. Ae ia taumafai ia fua i fua lelei e fia taumafa ai tagata i lona suamalie ma le tofo lelei.

**Fa'amanatu:** *O ō gatasi le fa'amoemoe o aiga, nu'u ma le Ekalesia mo oe le talavou, ma le olaga o lo o e ola ai?*

---

**ASO SA:** **7 ME 2023**

**MATAUPU:** **LILIUINA**

**Tusi Faitau:** Galuega 16: 16-35

### **FESOASOANI MO LE TA'ITA'I:**

O le tusi faitau o le matā'upu o lenei Aso Sa, o lo o fa'a-autūina i le liliuina o le leoleo falepuipui. O se fitafita Roma. O se tagata fa'amāoni i lana galuega. Na iloa lona fa'amāoni, ina ua taumafai e fasia ia lava i lana pelu, inu ua ia iloa ua leai ni pagota na lokaina. Ituaiga tagata ia, e musu e sese, pe sasi se fa'atinoga o

sana galuega. E musu e ta'uvalea lona tula'i mai fa'a-leoleo o le falepuipui. Ae sili ai lona musu i ta'uvalea le pulega a Roma i sana 'au'aunaga. Ae o le a le mea ua tupu? Ua fa'alētonu.

Peita'i o taimi ia na fa'ailoa ai le silisili 'ese o le Atua, e ala i lana 'au'auna, le aposetolo o Paulo. Fai mai le aposetolo: "*Aua ne'i faia e oe se mea leaga ai oe; auā o i'inei i matou uma lava*". Manatu ua sosola Paulo ma lana vaega, ae leai. Ua iloa ai, e lē o le loka i le falepuipui a Roma, o lo o fai ma fa'afitauli. Ae o le loka i le falepuipui, o le lē talitonu o le loto ma le agaga. Le loto ma le agaga, ua ta'ita'i sesēina i faiga a le pule o le lalolagi. Po'o le falepuipui i uiga ma tu'inanauga o le lalolagi. Le falepuipui lea, na'o le fa'atuatua lava i le Atua e mafai ona tatalaina. E pei ona iloa i le tali atu a le aposetolo o Paulo, i le fesili a le leoleo o le falepuipui o Roma. Fesili le leoleo o le falepuipui, "*Ali'i e, se a le mea e tatau ona ou faia, ina ia fa'aolaina ai a'u?*" Tali Paulo, "*Inā fa'atuatua ia i le Ali'i o Iesu Keriso, e fa'aolaina ai oe ma lou 'āiga.*

Fai mai le tala ua liliu le leoleo o le falepuipui atoa ma lona 'āiga, ma avea ma tagata mulimuli ia Keriso. Le liliuina ua moni, ua gaua'i ai, e faia i le mea e gata ai le lelei, le mea ua tasi ai lana filifiliga – O le fa'atuatua i le Atua. Fai mai le fuai'upu e 34 "*Ua na aveina 'ae foi ia te i ta'ua i lona fale, ma laulau atu mea e 'ai, ua 'oli'oli o ia ma lona 'āiga uma, ma fa'atuatua i le Atua.*" O fa'atinoga a le tagata ua liliu fa'amaoni i le Atua, e faia ma le 'oli'oli o le loto. Le lagona o le 'oli'oli, o le o'otia loloto o le agaga, ona o le amana'iaina e le Atua o lona fa'atuatua, e ala i le fa'aolataga. Ma ua iloa ai, o tua atu o le liliuina o le tagata, e ala i lana filifiliga tonu, o lo o i ai le alofa fa'amagalo o le Atua.

## GALUEGA FA'ATINO:

Tu'u le avanoa pe a ma'ea le matā'upu i le autalavou, mo se tasi e fai sana molimau, pe afai ua ia lagonaina le tāua o lenei matā'upu, i lona liliuina mai le olaga tuai, e avea ma talavou ua ola ia Keriso.

## AOTELEGA:

Tele falepuipui o lo o nonofo ai tupulaga talavou i lenei vaitau, aemaise lava tu'inanauga o lenei olaga. Le falepuipui o le lē usita'i ma le lē fa'alogo i le finagalo o le Atua. Le falepuipui o le taui ma sui. Tupulaga talavou, ia liliu ma o ese mai ai, ae fa'asaga e fai le finagalo o le Atua. Le finagalo o le Atua, ia amio lelei, loto maualalo ma fa'amagalo, tupu ai le fealofani ma le nofo lelei.

*Fa'amanatu: 'Aua ne'i galo, o le liliu i le Atua, o lo o lautua ai lona alofa fa'amagalo.*

---

**ASO SA:** 14 ME 2023 (*Aso Sa o Tinā*)

**MATAUPU:** O LE TINĀ OLA MĀGAFAGAFA

**Tusi Faitau:** 2 Tupu 4: 8-17

## FA'ATINOGA O LE MATĀ'UPU:

1. Pule lau susuga le Ta'ita'i i le vaevaeina o le autalavou.
2. Tofu le vāega ma le latou fa'auigaina o le tusi faitau, i ta'iala o lo o tā'ua i lalo.
3. A ma'ea, ona tula'i lea o sui mai vāega ta'itasi, e fa'amatala le latou taumafaiga.

- O le a le uiga o le tinā ola māgafagafa?
- Taumafai e fa'auiga le tusi faitau mai lo tatou malamalamā'aga i uiga o le tinā ola māgafagafa.
- O le a se fe'au mo tupulaga talavou?

## FESOASOANI MO LE TA'ITA'I:

O le Aso Sa lenei, o lo o fa'apitoa lava mo tinā. Ae tasi lea uiga o le tinā, ola māgafagafa. O se tinā e ola tāpenapena. E mataala ma mata'alia i le fa'atinoina o ona tiute. E va'ai mamao mo se lumana'i manuia o lana fanau. E i ai le agaga filigā, ma le fai mea sili mo se lelei o lona aiga. O lona uiga, e lē fa'atamala i ona nafa fa'a-tinā. Na te fa'atāuaina ai lona lotoifale, auā o 'i e afua ai ona tatala lana va'ai i tua atu, i so o se ala e manuia ai lona aiga. Leitioa fa'a'upuina le tinā, o ia o le ola o le 'aiga.

O uiga ia o le tinā ola māgafagafa, o lo o atagia i le fafine Sūnema. Fai mai le tala, o le ala o i ai le fale o le tinā lea, e masani ona uia e le perofeta o Elisaia i ana malaga tala'i. Lea la na ia agalelei ai, ma ofoina atu lana galuega lelei, ina ua ia pulunaunauina se'i mapu ane e fai se mea'ai. Ona fai lava lea ma masani a le perofeta. A'o i na iloa tino ai e le tinā lenei, o le tagata o le Atua o lo o ia agalelei i ai.

O le lē tā'ua o se igoa o le tinā i le tala, ae o lo o tā'ua Sunema o le nu'u o lo o nofo ai o se 'a'ai itiiti ma le fa'atauva'a, ua tatou iloa ai, le tulaga maualalo o lea tinā i totonu o lona si'omiaga. E ui lava o ia o se tinā e telē lona tamaoaiga, pe a fua i lana tapenaga na fai, ae ina ua ia fa'atino lona talimālō lelei, ma iloa ai o ia o se tinā ola māgafagafa. O le faia o se afeafe itiiti i luga e fai i le pa puipui o le fale, o le ata o se tinā e malu ai lona 'āiga. E aputiputi lana fanau. O le tu'uina ai o se moega, o le fa'ailogia o le

māfanafana o le alofa fa'a-tinā, e fusia ai ona tagata. O lo o tā'ua le laulau, o lo o iloa ai se tinā e ola fa'aso. E lē gata i mea na te maua, a'o taleni foi ma agava'a. E lē limamau. O lo o tā'ua foi le nofoa, o le ata o se tinā, e mapu ma malolo ai sē ua fia maua se fesoasoani. Ma le tu'ugalamepa, o le fa'amoemoe o le tinā ia avea o se lamepa e lotolotoi i le pogisa o fa'afitauli, o le a le mate le susulu atu o lona malamalama, e ofaga i ai tagata.

#### AOTELEGA:

E 4 lava ni mea tāua o lo o atagia i le tusi faitau e iloa ai se tinā ola māgafagafa.

1. A tatou agalelei atu, e ao ina fai le tiute mai le loto po o le lagona alofa moni. E leai se masaniga a Elisaia ma le fafine Sunema. Ae ua alofa ane lava ona o le faigata o le ala o lo o ia uia.
2. A tatou faia se galuega lelei mo se isi, ‘Aua tatou te fa'amoemoe e toe taui mai. E le'i faia tapenaga a le fafine, ona o le mana'o i se taui. Ae na fai, ona o lona fa'atuatua i le Atua e ana le auauna o lo o i lona fale.
3. ‘Aua nei tatou faia se galuega lelei, e si’itia ai le va'ai maualuga ma le fa'aaloalo mai o tagata. O fuafuaga a le fafine Sunema, e leai se fa'amoemoe ina ia iloa e nisi tagata, ua na o i la'ua lava ma lona to'alua.
4. Ia tatou fa'atino o tatou tiute, ina ua tatou iloa o se mea e tatau ona fai, ona taui mai lea e le Ali'i o lo tatou agalelei. Na fesili Elisaia i se mana'o o le fafine se'i ona taui ai lona agalelei. O le fafine sa leai sa na tama, ma ua toeaina fo'i

lona to'alua. Na fa'amanuia i ai Elisaia ma tauia i lona fanauina o se tama. O le tama, o le meaalofa mai le Atua mo le tinā ola māgafagafa ma fai galuega alofa i lona aiga ma tagata ese.

*Fa'amanatu: O se talavou ola māgafagafa, o se talavou manuia.*

---

**ASO SA:** **28 ME 2023**

**MATAUPU:** **O LE TALA LELEI MA SUIGA FOU**

**Tusi Faitau:** **Mareko 2: 21-22**

#### FA'ATINOGA O LE MATĀ'UPU:

O lenei matā'upu e fa'atāuaina ai le aogā o suiga fou i le tala'iina o le Tala Lelei

- Fa'aali sou manatu, po o a ni suiga fou o lo o tatou molimauina i lenei vaitau i le lāugaina ma le tala'iina o le Tala Lelei?
- O a ni ona aoga mo i tatou le Au Kerisiano

#### FESOASOANI MO LE TA'ITA'I:

O upu ua tatou masani ai, e sui sui lava faiga ae tumau fa'avae.

A tatou toe mafaufau i le tausaga na te'a nei (2022) i a'afiaga o le Tala Lelei ona o le Koviti 19, o le mea moni lava, sa telē le aoga o suiga fou (internet) ma auala o feso'ota'iga, i le lāugaina pea o le Tala Lelei i lea taimi. O sē tasi o tapu a le mālō, na fa'asāina ai ona toe fa'apotopoto tagata, e aofia ai ma Tapua'iga. O le aogā la o suiga fou, o le fa'aaogaina o upega tafa'ilagi pei o le Facebook,

You Tube ma isi, fa'apea fo'i i auala o feso'ota'iga pei o telefoni fe'avea'i, e auala atu ai le fe'au o le Tala Lelei i tagata ta'ito'atasi. Ua mafai ai ona tapua'i mai le tagata ia i lona lava fale ma matamata i le sauniga o lo o pu'eina atu e le faifeau. O lona uiga, e sui lava auala e momoli ai le Tala Lelei i tagata, ae tumau pea le fa'avae o le Tala Lelei. O le tala'iina o le Tala Lelei, e tatau ina talafeagai ma le ta'aviliga o le lalolagi o lo o tatou ola ai. E tatau lava ona amana'ia e le Ekalesia suiga mai lea taimi i lea taimi. Auā e le mafai ona taofia le gasologa o lo o aga'i i ai le lalolagi ma ona suiga.

#### **Feso'ota'iga i le tusi faitau:**

A toe fa'a'upu le faitauga ina ia faigofie ona malamalama i ai, 'o le uaina fou i le fagupa'u tuai, e lē taitai ona talafeagai, e tusa ma a'oa'oga a Iesu. O le ie fou e fonofono ai le ofu tuai, e lē talafeagai, ona e i'u ina maumau ai le ie fou. O lona uiga, e ma'imau le uaina fou ma le ie fou, ae lē o'o i se taunu'uga lelei.'

O ni tala fa'atusa faigofie i mea o lo o masani ma ola ai tagata Palestina i le taimi o Iesu, ae o lo o afīfi mai ai le uiga moni i le Tala Lelei.

O Iesu o le uaina fou, e lē tatau ona tu'uina i totonu o ni fagupa'u tuai. E tatau pea ona fa'afouina mea uma, ona tumau lea o le uaina e lē maumau. O Iesu o le ie fou, e lē tatau ona fonoa fa'atasi ma se ofu tuai. E tatau ona su'i se isi ofu fou i le ie fou ona aogā lea o le ie fou.

#### **AOTELEGA:**

O le Tala Lelei fo'i, e tatau ona lāugaina ma tala'iina i ala talafeagai ma lona taimi. O le Tala Lelei e ao ona totōina i le

ele'ele fou o lo o soifua ma ola ai tagata, ona mafai lea ona ola talaulau ma lausiusi. E fua le molimauina o le Tala Lelei i le taimi ma mea o lo o tupu ai, ona lē maumau lea o le uaina fou ma le ie fou, o Iesu Keriso.

***Fa'amanaatu:** Ia fou pea lou talavou e tala'iina le Tala Lelei, ona lē maumau lea o le uaina fou ma le ie fou o Iesu Keriso.*

---

**ASO SA:** **4 IUNI 2023**

**MATAUPU:** **O FOLIGA MA UIGA O LE ATUA I LE FEAGAIGA TUAI**

#### **FA'ATINOGA O LE MATĀ'UPU:**

- Vaevae le autalavou i vaega se lua pe tolu fo'i, ona fai lea o se su'esu'ega i le Feagaiga Tuai, po o a ni foliga ma uiga o le Atua o lo'o atagia ai.
- A'o a foliga o le Atua ia te oe le talavou? Fa'amatala.
- A ma'ea, ona tula'i lea o se sui mai nei vaega ta'itasi e fa'amatala le latou su'esu'ega.
- Ia fai ma fa'amaoniga o le latou su'esu'ega mau mai le Tusi Paia
- Ia talia foliga ma uiga uma o le a aumai e le Autalavou mai le Feagaiga Tuai..

#### **FESOASOANI MO LE TA'ITA'I:**

##### **1. O LE ATUA FUĀ.**

O le finagalo lava o le Atua, ia 'aua lava ne'i fōua e seisi lona mamalu ma lana pule aoao. E atagia ai ii o se Atua Fuā. (*Esoto 20: 5; Teuteronomie 4: 24*)

I aiaiga o le feagaiga a le Atua ma Isara'elu, e tatau lava ona fa'amaoni Israelu i le avea o le Ali'i le Atua ma o latou Atua e to'atasi, afai e leai, ona o'o lea o Israelu i se tulaga pagātia ona o le Fuā o le Atua. (*Esoto 34: 14*)

## 2. O LE ATUA PA'IA, O LE ATUA MAMALU.

O le pa'ia ma le mamalu o le Atua, e fa'atatau i le tulaga ese o le Atua lava Ia e lē mafai ona fa'atusatusaina i sē tasi. O le mafua'aga fo'i lea e lē latalata i ai se tasi pe ulagia fo'i ese tagata. Auā o le iuga lava o le otī. (*Levitiko 10: 1-7; Esoto 3: 5*)

## 3. O LE ATUA AMIOTONU.

O le Atua amiontonu, o lana pule aoao lea i le lalolagi e tusa ma lona lava finagalo pa'ia. E lē fai mea fa'aufufi, e lē fai mea fa'apito pe fa'aitu'au fo'i, ae tutusa uma lava tagata i lana silafaga. (*Numera 27: 1-11*)

## 4. O LE ATUA ALOFA.

Tatou fa'alogo so'o i le soli feagaiga o le nu'u o le Atua. O le mafua'aga lea na fa'atāfea ai ma ola pologa i isi nuu ese. Peita'i, tusa ai ma tusitusiga perofeta, o le tu'ulafoa'iina e le Atua o lona nu'u, e mo na'o sina taimi ae lē fa'avavau. (*Isaia 54: 7-8*) Aisea? O le mafua'aga, ona o le alofa o le Atua. O le alofa lea o le Atua na te lagonaina ai fa'atasi ma Israelu le tīgā ma le matuitui o le tulaga ua o'o i ai lona nu'u. (*Ieremia 31*)

## AOTELEGA:

O foliga uma nei o le Atua o lo'o atagia i le Feagaiga Tuai, ua tatou malamalama ai, i le fa'amoemoe o le Atua ia tumau pea le so'otaga mafanafana ma le so'otaga alofa o Ia ma ona tagata. E ui

a ina malepe lea so'otaga ona o le tagata ua pa'u i le agasala, o lo'o sa'ili mai pea le Atua ina ia toe soso'o ma toe fa'afouina lana mafutaga ma lana tagata na fai.

**Fa'amanatu: Ia atagia fōliga o le Atua i o tatou ola.**

.....

**ASO SA:** **11 IUNI 2023**

**MATAUPU:** **MANATUA LE ULUA'I ALOFA**

**Tusi Faitau:** Fa'aaliga 2: 1-7

## FESOASOANI MO LE MATĀ'UPU:

O le tusi faitau o le tatou matā'upu i lenei Aso Sa, o le tusi i le Ekalesia i Efeso e pei ona iloa i le amataga, na fa'atonuina e Keriso ia Ioane ina ia tusi i agelu i Ekalesia e 7, po'o ta'ita'i o lo o va'aia nei Ekalesia e 7.

O fuaiupu tāua o le tusi i Efeso o lo'o i le (2: 2&4) "Ua ou iloa au galuega, o lou tīgā, ma lou onosa'i.....A ua ou lē fiafia iā te oe, ona ua e tu'ua le ulua'i alofa."

O le upu galuega e tāua tele i le tusi o Fa'aaliga. E fa'a-20 ona fa'aaoga e Ioane le upu lea, ae fa'a-12 ona fa'aaoga i le matā'upu e 2 ma le matā'upu e 3. O lo'o atagia ai le feso'ota'iga o galuega a le tagata fa'atuatua o lo'o faia i le lalolagi, ma le iuga o le ola. O galuega ia o le onosai i puapuaga. O galuega o le onosai e molimau atu Keriso tusa lava pe sauāina ai.

O le ulua'i alofa o lo'o tāua ua tu'ua, o Iesu Keriso. O le Ekalesia i Efeso ma lona tau amataina, o se Ekalesia fe'oe'oea'i ma

fealolofaa'i, ua amata ona avea ma Eklesia felotoa'i ma feva'ava'aa'i. O le fa'atuatua o le Eklesia ua amata ona avea ma fua e fua i ai le ese'esega o le isi tagata ma lē isi tagata. Po o ai e sili lona fa'atuatua. Ua amata ona alu ese mai le fa'atinoga o lana fatuiga tausi i le Eklesia a Keriso. E tatau lava ona tumau lana molimau ia Iesu o le ulua'i alofa.

O le fe'au mo le Eklesia i Efeso, ia manatua le ulua'i alofa o Iesu Keriso, na mafai ai ona latou tauave tīgā ma onosaia faigata o le avea ma auauana a le Atua i totonu o taimi faigata o le ola. Ia tumau pea i le talitonu ma fa'atuatua ia te ia, auā o Ia o le afuaga o lo latou manaia ma le ta'uleleia.

#### AOTELEGA:

O le vaivaiga masani lava lea o le to'atele o tupulaga. E fa'amaniuaina loa i ni a'oga maualuluga pe si'itia fo'i tulaga i totonu o fare faigaluega, te'i lava ua lē toe fia auai se lotu, te'i lava ua lē toe fia auai i aufaipese ma le autalavou. Ae sau le tala, ona ua tele lona pisi i lana galuega. E tatau ona maua sana malolo lelei ona o lo o faigaluega ma a'oga. O le fe'au o le tusi i Efeso, ia manatua le ulua'i alofa.

#### GALUEGA FA'ATINO:

- O nisi tala o le tusi pa'ia o lo o iloa ai le fa'afitauli lea pei ona maua ai le Eklesia i Efeso? Ua latou fa'agaloina le alofa o Iesu Keriso na mafua ai ona latou lavātia tatali mafatiaga, ae ua ola i se olaga e lē fiafia ai Iesu.

*Fa'amanatu: Manatua le alofa o le Atua na maua ai manuia.*

---

**ASO SA:** **18 IUNI 2023**

**MATAUPU:** **ALOFA E FAAVAE I LE LOTO MAMĀ**

**Tusi Faitau:** 1 Timoteo 1: 1 - 11

#### FA'ATINOGA O LE MATĀ'UPU:

- A ma'ea ona fa'amatala le matā'upu, ona taumafai lea e fa'atusatusa le fa'afitauli o lo'o tupu i le Eklesia i Efeso i a'afiaga o le talitonuga kerisano i isi tu ma aga, e lē o ni kerisiano, ma le tatou talitonuga kerisiano ma ona a'afiaga i a tatou tu masani.

#### Fesili fa'atupu manatu:

1. O a ni tu ma po o ni a tatou faiga masani fo'i ua a'afia ai lo tatou talitonuga fa'a-kerisiano?
2. O a ni fa'afitauli o lo o molimauina ona o ia a'afiaga?
3. A o le a se fofō o lea fa'afitauli?
- Tu'u le avanoa i sui ta'ito'atasi o le autalavou e fa'asoa mai ai, pe'afai ua maua sona manatu.

#### FESOASOANI MO LE TAITAI:

O le tusi faitau o le tatou matā'upu o lenei Aso Sa, o apoapoa'iga a Paulo i lona atali'i fa'a-le-agaga o Timoteo, i le ulua'i taimi o lona soifua auauna i le Atua, e ala i le ta'ita'ia o le galuega i Efeso. O taimi o le talavou o Timoteo, a'o taimi pito i sili lea ona faigatā ona o fa'afitauli o le galuega.

E fa'apea le fa'amatalaga, e i ai tagata o le Eklesia i Efeso, e popoto tele i tala'aga o le lalolagi, ma tala o le vavau, ma ua latou

taumafai ai e pulea le lotu kerisiano, i ituaiga malamalama nei. O le fa'afitauli lea ua tupu i le Eklesia i Efeso, ua fua le ta'u-kerisianoina i le poto i ituaiga tala nei. A o nisi o ia tala, o tala fa'apaupau, ma ua tau ese ai le tala'iina o le fa'a-kerisiano. Ua taumafai e tu'u fa'atasi le fa'a-kerisiano ma isi tu ma aga. A'o le fa'afitauli sili, ua ola fa'atususa ai tagata o le Eklesia. Ua tauvā po o ai e sili atu lona poto i tala o le vavau ma tala'aga o le lalolagi. Ua tupu ai le felotoleagaa'i ma ua fai kegi ai le Eklesia. Ua fesilisili po o ai e maualuga lona gafa, po o fea fo'i e tupuga mai ai e pei o tala o le vavau. Manatu nisi e tatau ona avea i latou ma faiaoga e a'oa'oina lea malamalama. A o nisi fo'i ua latou fesiligia foa'i masani mo le atina'eina o le lotu i Ierusalem.

O le mafua'aga lea o le fa'amalosi o Paulo i lona atali'i o Timoteo. A o se fautuaga e amata ia te ia ona vavao atu. Ia fai o ia ma fa'ata'ita'iga ma taulamua ia te ia ona fa'atino le alofa e fa'avae i le loto e mamā. O le alofa e fa'amuamua ai le isi, ae fa'amulimuli le ita. O lo o atagia ai le ola fa'apa'iaina ma le ola fa'amamāina i luma o le Atua. O le alofa lava lea i le Atua, e iloa i le fa'atinoina i le alofa atu i isi e pei o oe lava ia te oe.

#### AOTELEGA:

E māfua ona tupu le vevesi, ona ua leaga le loto. Fai mai Paulo ia Timoteo, amata vavao e tatou le loto leaga ma uiga lē lelei, i le fai o i tatou ma fa'ata'ita'iga. E taulamua i tatou i la tatou amio, e iloa ai o lo o tatou ola i se olaga fa'apa'iaina ma le fa'amamāina.

**Fa'amanatu: Ia tatou taulamua i le fa'atinoina o le alofa e fa'avae i le loto mama.**

---

**ASO SA:** **25 IUNI 2023**

**MATAUPU:** **FA'ALELEIGA**

#### **FA'ATINOGA O LE MATĀ'UPU:**

- Fautuaina lau susuga i le Ta'ita'i e fa'atalatalanoa le matā'upu ina ia malamalama lelei le autalavou i le uiga moni o le fa'aleleiga.
- Fautuaina fo'i ia tāpā se fesoasoani mai ni matai matutua o le aulotu ma le faifeau ina ia fa'alauatele ai le uiga moni o le fa'aleleiga, aemaise o le ifoga i le tatou fa'a-Samoa.

#### **Fesili ta'iala.**

1. O le a le uiga o lea upu - Faaleleiga
2. O a nisi tala o le tusi pa'ia e atagia ai se leleiga?
3. O a ni fa'atinoga o lo o tā'ua i ia tala o le Tusi Pa'ia e iloa ai o lo'o taumafai mo se fa'aleleiga?
4. O a ni auala i le tatou fa'a-Samoa e iloa ai o lo o faia se fa'aleleiga?

#### **FESOASOANI MO LE TA'ITA'I:**

**Fa'aleleiga-** o le fa'aleleiga, o le fa'amutaina lea o se vevesi ma ni misa. A'o le faamoemoe maualuga, ia maua le nofo lelei ma le fealofani o e a fe'ese'esea'i. O se fa'atinoga o lo o affī mai ai le loto fa'amagalo, salamō ma le toe fa'afouina o le mafutaga. I le va'ai a le kerisiano, o le fa'aleleiga e afua mai i le Atua. O le fa'aolataga na saunia e Iesu Keriso, o se fa'aleleiga i le va o le Atua ma lana tagata na fai na malepe ona o le agasala.

**Fa'aleleiga i le Tusi Pa'ia-** o le upu fa'aleleiga, fa'ato'a maua lava i le Feagaiga Fou, peita'i o lo o atagia i le Feagaiga Tuai le agaga o le fa'aleleiga.

1. **1 Samuelu 25-** Ina ua fa'alogo Apikaila ua aga'i atu Tavita e tauimasui i lona ali'i o Napalu, na ia fa'avave atu ma fa'afeiloa'i ia te ia ma talosaga ina ne'i o'o lona lima ia Napalu. E 3 ni auala na faia e Apikaila o lo o iloa ai le agaga o le fa'aleleiga. (1) O aga fa'atinoina (*gestural plea*). O lo o tā'ua ai le fa'apa'u faō o Apikaila i luma o Tavita. (2) O se talosaga e fa'aleo i upu (*verbal plea*). E lē gata o le fa'apa'u faō, ae sa augani atu fo'i ia Tavita. (3) Sa ia foa'iina foi ni meaalofa mo Tavita (*external gift*). O le naunauta'iga o Apikaila ia fa'amagaloina e Tavita se sese o Napalu.
2. **Kenese 33-** O le sa'ili atu o Iakopo ia toe fa'alelei ma lona uso o Esau. Na taumafai Iakopo e foa'i atu ia Esau ni meaalofa se tele, foliga mai ina ia fa'atauina le loto fa'amagalo o Esau. Ae peita'i, o le fa'amagalo a Esau i lona uso, na faia lava e aunoa ma le mana'o i ni meaalofa (*fuai'upu 9*).
3. **Efeso 2: 13-16-** I le manatu o Paulo, e le o le tulaga e pei ona ta'ua i le Feagaiga Tuai e maua ai se leleiga, a o Iesu. O Iesu e mafua ai ona lelei ma tino e tasi le tagata Iutaia ma le tagata o nu'u ese, fa'atasai ai ma e ua fevaevaea'i. O lona uiga, a maua Iesu, o Ia lava e maua ai le leleiga i le va o tagata ua masesei. O lona toto na faia ai le fa'aleleiga a le Atua ma le tagata agasala.

**Fa'aleleiga i le Fa'a-Samoa-** o le ifoga i le fa'a-Samoa, o le taunu'uga lea o le agaga o le fa'aleleiga. O le fa'ailoga o le o'otia

loloto ona ua lagona le sese. E lē gata mo lē na sese (*perpetrator*), a o ona tagata uma ua latou lagonaina le agaga maualalo e fa'atoese ai ma talosaga mo se fa'amagaloga a lē ua a'afia (*victim*), ma ona fo'i tagata. O le fa'amoemoe lava, ia ta'utino le sese ma fa'alogo atu i upu o le fa'amagalo mai, ona maua lea o le nofo lelei, le fealofani ma le fefa'amagaloa'i. O le finagalo lava lea o le Atua mo ona tagata.

#### AOTELEGA:

O le mea mautinoa lava, e tutupu pea fevaevaea'iga ma fe'ese'esea'iga i lo tatou lalolagi. Ae lē tatau ona ola ai pea fa'apea tagata. O Iesu lava na fetalai a o le'i afio i le lagi, ia outou fealofani. Po o a lava fa'atinoga mo se leleiga, o le mea tāua ia maua le fefa'amagaloa'i ma le nofo lelei o tagata. Ae ia avea o se fa'aleleiga e afua ona o le manatu ia Iesu ma lona alofa mai.

**Fa'amanatu: Ia nofo lelei tagata uma e pei ona finagalo ai le Atua.**

---

**ASO SA:** **2 IULAI 2023**

**MATAUPU:** **O LEO LE LAGONA O TAMAITAI.**  
*(The unheard voices of women)*

**Tusi Faitau:** Kenese 29:15 – 31

O le faamoemoe o le mataupu o lenei Aso Sa ina ia faa-talanoa le aafiaga ma le sauāina o tinā ma Tamaitai. E tele tala o le Tusi Paia o lo o atagia ai le sauaina o Tina ma Tamaitai.

## **FAATINOGA O LE MATAUPU :**

- E taua le faamalamalama e le Taitai o le mataupu ma le fesootaiga i le Tusi faitau e pei ona avatu i luga.
- Ia fetufaai i ni vaega e mafua ai ona le lagona le leo o tamaitai i totonu o aiga Samoa, aemaise o le tutupu ai pea o le sauaina o tinā ma tamaitai.
- O a ni mafuaaga e mafua ai ona le lagona leo o Tamaitai i totonu o aiga, nuu.

## **MANATU MO LE TAITAI**

O le leo le lagona o tamaitai, o se tasi lea o anavatau o lo o tau galueaina pea, leaga o le isi lea afuaga natia o le sauaina o tinā ma tamaitai. **O le fesili – E mafua aisea ona le lagona le leo o tamaitai i totonu o Aiga, Nuu, ma so o se sosaiete?????**

I totonu lava ia o le li'o o le aiga, faapea le aganuu. E le o i ai se pa puipui e tapu ai le leo o tamaitai. O le tafatolu o aiga samoan, o iina e lagona ai le leo o tamaitai, e fofola ai manatu ma lagona. Peitai o le mea moni, ua oo a i le lotoifale faaleaiga, o le tomaaga lea o le leo le lagona. Ua le mafai ona toomaga i ai le ola taotaomia ma le leo le lagona o tamaitai.

E faapena se vaaiga o lo o atagia i totonu o le lotoifale o le aiga o Lapana e pei ona faitauina. O le tala ua faatagiao, Le auauna ai o Iakopo ia Lapana mo tausaga e 14. A o lona totogi o le avatu lea i ai e Lapana o lana fanau tamaitai. Ua pei e faatau **le tamaliiga o le fanau teine** a Lapana, peitai e ese foi lagona o ia vaitau ma le amataga o folafolaga a le Atua.

I tusitusiga lava ia faa-Feagaiga Tuai – e tele faamaumauga o lo o atagia ai le fenofoai o sootaga faaleaiga. E lei afaina tele lea i le

silafaga a le Atua ona o le taimi lea o le tau faatagataina o le lalolagi, ina ia uluola ma fanafanau e pei ona ia folafola ai i le amataga. E mulimuli ane sa toe fausia e le Atua le tulafono, ina ia tapu ai loa le fenofoai o sootaga faaleaiga i le va o Matua ma fanau ma e vāvā lalata.

A o le tu foi ma le aga faa-Iutaia i ia vaitau. E pei e le aloaia ai le tulaga o tamaitai ma tina sei tulou. E lima taitaina uma mea i le leo o le tamā o le aiga. E alu a i le i'a a le fa'aloalo nai tinā ma tamaitai, e oo a i le tulaga o le sailia o se tane a se tamaitai.

Peitai, i le tala lava ia, e le o faavaea i le alofa faaleuo le faiga o faaiuga a Lapana, ae ua faia ina ia taunu folafolaga a le Atua. Ioe! o le agaga lena o le Atua o lo o galue ia Lapana ina ia faataunu ana folafolaga. O le ata o le Atua, e galue mai mo le tagata i ana folafolaga ua uma ona fai. O mafuaaga foi ia lea e manatu ai, ua le lagona ai le leo o le fanau a Lapana. O le manatu taua o lo o aumaia e Kenese, ina ia taunu folafolaga na faia ia Aperaamo ina ia faatoateleina lana fanau.

*Ona auauna ai lea o Iakopo i tausaga e fitu ona o Rasela... O ia vaitau, o le totogi o le tagata auauna mo le vaaia o lafumanu, e tusa lea ma le 10 sekeli le mamafa o tupe siliva. A o le 10 sekeli o tupe siliva, pe a lea ma le 50.00 tala samoan. O lona uiga e 50 tala le totogi i le tausaga e tasi. O se tupe itiiti pe a fua i ai i lenei vaitau. Peitai o se tau talafeagai lea i ia vaitau. E le taua la le itiiti pe tele, a o le vaega e fia faataua, e peiseai e foliga mai ua faatau i le tupe siliva le tamaliiga ma le oloa taua na foafuaina mai e le Atua.*

**Fesili:**

1. E talafeagai le filifiliga na faia e Lapana mo lana fanau teine i le olaga o aso nei?
2. O le a le folafolaga a le Atua e talafeaugia ai le filifiliga na faia e Lapana?
3. O le a se a'oa'oga e taua ai le leo o tamaitai i nei ona aso?

**AOTELEGA:**

O le leo le lagona o tamaitai, o le tutupu lava lea o le sauaina o tinā ma tamaitai. E i ai itu e mafua ai ona le lagona leo o le fanau a Lapana i le tala e pei ona i ai le manatu ina ia taunu folafolaga a le Atua ma le tau faatagataina o le lalolagi i lona amataga. Peita'i, e taua lava le aoaoina o le autalavou i le sauaina o tinā ma tamaitai ona ua le lagona o latou leo i totonu o le sosaiete. Ina ia mafai ai ona maua se feau taua e aoaoina ai i sauaga o lo o tutupu pea i fanau teine.

.....

**ASO SA:****9 IULAI 2023****MATAUPU:****ALA I LE PULE O LE TAUTUA:**

*“O ai lena tamaitiiti tautalaititi, e leai sana avanoa o lona tamā o le faiava”.* O upu ia sa agiga i totonu o le talanoaga a le Aiga o lo o faia i le fale tele. E topetope lava lima ma vae o si tama o Simi i le faiga o le suavai mo le talanoaga, ao ona taliga o lo o tata'a a'e i totonu o le moa o le fale o lo o faia ai le taupulega mo se isi e nofo i le Aiga. E lei popole tele Simi aua o lana tautua sa tau asu ai le ipuvai ma tutu le afi, o lana lea molimau o lo o sauni iai.

E faigata le avanoa e saofai ai Simi i totonu o le fale, ao lana tautua o le 'ai lea na feau ifo ai e le aiga. Peitai e le i faigofie e suli ona talia le faasuafaina o Simi. E agiga lava le gagana *tautalaititi*...Na iu ina faigata le mataupu ma agai ai loa i le faamasinoga. O le upu moni e malosi le mea moni, ae le moni se mea malosi. O le malosi o le oa ma le tamaoaiga o le tulaga maualuga ma le faaeaina e lei avea lea ma ala e tafisea ai le moni o le tautua o lo o faatino i totonu o le aiga. E lei faigata le faaiuga ina ua tali manino fesili e tolu na fesiligia ai e le Faamasino itu uma. O ai o lo o faia monotaga i le nuu? O ai o lo o tautuaina le Eklesia? O ai o lo o nofo i le Aiga?? Simi!!E tasi lava le auga o nei fesili o le Tautua, o le tautua e sosoo ma le pule.

**Faatinoga o le Mataupu:**

- Faitau le tala puupuu ua tuuina atu i luga ona faatalanoa lea i le autalavou
- Vaevae le Autalavou i ni vaega se lua

Vaega 1: Aisea e tatau ai lava ona matai le tagata o lo o faia le tautua i totonu o le Aiga?

Vaega 2: Aisea e le tatau ai ona faa-matai se faiava i totonu o se aiga?

**AOTELEGA:**

1. O a ni suiga ua i ai nei vaitau i le tofiaina o se e na te tauave le matai ma tausia le aiga?
2. A o a ni mafuaaga o nei suiga?

Manatu Mulimuli : Ia tuu le avanoa i le au matutua o le Autalavou e faalautele ma faailoa ai ni o latou manatu e uiga i le mataupu.

**ASO SA:** 16 IULAI 2023

**MATAUPU:** MITI I LE LUMANAI MANUIA

**Tusi Faitau:** Isaia 2:2 – 5

O miti – o ni mea ia e tutupu i mafaufauga i taimi tatou te momoe ai. E miti pe a mamafa se mea i le mafaufau, e miti pe a ova le fiafia, e miti foi pe a ova le faanoanoa. O nisi moemitiga e faaali mai ai se mea o le a tupu i le lumanai, a o nisi o miti e manatua ai ni mea ua tuanai. **O miti foi e mafai ona faauigaina o ni mea o lo o manatu ai mo le lumanai manuia.**

Faatinoga o le Mataupu:

- Ia tomua i le faa-talanoa o le uiga o le upu miti
- Vaevae le Autalavou i vaega e tolu
- Ia tofu le vaega ma Tusi Faitau ua tuuina atu
- Talatalanoa ma sailili po o a uiga o miti, a o le a foi se fesootaiga mo le olaga o le tupulaga talavou
- Ia faasoa pea lau Susuga i le taitai i le uiga o le miti a Isaia pe a maea manatu o vaega taitasi.

Vaega 1: Miti a Tanielu (Tanielu 4:10 – 18)

Vaega 2 ; Miti a Iakopo (Kenese 28:10 – 15)

Vaega 3 : Miti a Iosefa (Kenese 37 : 5 – 31)

### **MANATU MO LE TAITAI:**

O le tusi sa faitauina o le valoaga, po o tala i mea o le a tutupu i le lumanai ia Iuta ma Ierusalem. O le miti lea na faaali ai le Atua i le perofeta o Isaia. E ui ona ua agasala le nuu i luma o le Atua,

peitai e na ona tauia o le agasala a o lo o i ai le faamoemoe lelei e manuia ai le nuu o le Atua pe afai e salamo ma toe foi i lo latou Atua moni. O le fesili – O le a tonu le taimi lea e manatu le perofeta e taunu ai nei moemitiga ua vaai i ai? O lo o taua “*aso e gata ai*”. O lona uiga e le o i ai se faamoemoe o se taimi vave o le lumanai e oo ai nei moemitiga. A o le uiga lea o le valoaga o lo o faatatau i le afio mai o le Alii Faaola o Iesu. Aua o le mea moni e le mavae pea le Isaraelu e femoumouai, peitai o le taimi o le faaolataga tele mo Isaraelu o taimi lea o le Mesia.

I le miti po o le faaliga na iloa e Isaia o lo o fa'aali ai le Atua i le faaolataga tele. O le afio mai o le Mesia, ua faatusa i le fare o le Alii i tumutumu o le mauga o Ierusalema. E omai Iuta ma nuu uma lava ma latou faapea ane - *Omai ia, tatou o a'e i le mauga o le Alii, o le fare o le Atua o Iakopo*”. O le manatu lava ia faa-Feagaiga Tuai ia Isaraelu – O Ierusalema lava ia o lo o i ai le malumalu o lo o afio ai le Atua o Isaraelu. Le ala lea e tausili ai lava tagata Iutaia ina ia o a'e i Ierusalema. O le malumalu o lo o i ai le atolaau a le Atua ma lona mamalu silisili ese.

Fai mai le miti - “*pelu e fai ma uamea o suotosina, o latou tao e fai ma polo e teu ai vine, e le sii atu le pelu a le tasi malo i le tasi malo*” O le a le uiga o nei upu?? Ioe suia le pelu i suotosina o mea e fa'aaoga mo faatoaga ma taimi o le seleselega, o le tao ua suia ma naifi e teu ai vine, o faailoga o le ola galulue ma le filemu.

O le miti a Isaia, o le filemu e aumaia e le Atua mo le Lalolagi, e leo se filemu na afua ona o le tagata, a o le filemu e aumaia e le Atua ona o lona **alofa tunoa**. Aoao mai foi mo i tatou le Autalavou. O lea ua tatou i ai i vaitaimi o le manuia na moemiti ai le perofeta, ua uma foi ona faatino e ala i le maliu o le Alii Faaola.

A o le a se miti o tatou manatu ai mo o tatou lumanai??Ia tatou miti i so tatou lumanai e ala lea i lo tatou toaaga i le aoga, faalogo ma usitai i matua, auā o ala ia e fesoasoani mai ai le Atua mo lo tatou lumanai lelei.

---

**ASO SA :**           **23 IULAI 2023**

**MATAUPU:**       **FAALOGO MA LAGONA**

**Tusi Faitau:**      Luka 8: 4 – 21

**Faatinoga o le Mataupu:**

- Vaevae le autalavou i vaega e 4
- Ia tofu le vaega ma ituaiga eleele na luluina ai le saito
- Ia faamatala le uiga o le eleele ma ona uiga
- O le a se fesootaiga ma le soifuaga o le Tupulaga Talavou

**Vaega 1 :** O fatu saito muamua na pau i le auala, ona solia lea e tagata ma aina e manu felelei. O lona uiga o e ua faalogo, ona alu ane ai lea o le tiapolo ma aveeseina le upu sa i o latou loto, ina ne'i faatuatua i latou ma faaolaina. O le auala lava ia o le mea e savavali ai tagata, e le faigofie i se saito ona ola ai. E faapena le ata o le tagata e na ona faalogo ae le lagona lelei. Aua e faigofie ona tosina lona mafaufau i faiga malolosi a le fili.

**Vaega 2 :** Na pau i le mea papa, ua tupu peitai na vave ona mago ona a'a aua e le o i ai se vai. O lona uiga, o latou ia ua faalogo ona talia lea, peitai ua leai ni aa e mau lelei ai. Ua latou faatuatua mo ni nai aso, ua oo atu i le aso e faaosoosoina ai ona o ese ai lea. Ua

iloa gofie le laau e ola i luga o se papa, e le umi se taimi e ola ai aua e le o mafai ona mau lelei ona aa i le papa. O uiga masani foi ia o le tagata e femoumouai ma faavaitaimi. Ua na o sina taimi e usitai ai, ona toe foi lava lea i le olaga tuai.

**Vaega 3 :** O lona tolu na pau i le vao tuitui, sa fetineiai ma le vao tuitui ma faigata ai ona ola. O i latou ia ua faalogo, peitai e fetineiai i taimi e oo mai ai le popole, o le oa ma le tamaoaiga, ma mea faafafia o le olaga nei, ona le mafai ai lea ona fua mai i ni fua lelei. O uiga masani ia o le soifuaga e i ai taimi tatou te popole ai, ona ua leai se tupe. E taua le oa i le ola nei, peitai e sili ai le taua o le faalogo i le finagalo o le Atua.

**Vaega 4 :** O lona fa na pau i le eleele lelei, ua tupu ua fua mai taiselau i fua. Oi latou ia ua faalogo i le upu ma latou tausi ai ma le loto faamaoni, ona fua mai ai lea ma le onosai. O le eleele lelei ua faatusa i ai le tagata lelei, o le tagata lelei e na te talai le afioga a le Atua e ala i le faalogo ma faatino, ona fua mai lea e ala i le manuia e na te maua e le gata i le ola faaletino, ae sili ai lona manuia i le ola e faavavau.

**MANATU MO LE TAITAI:**

O le faalogo e tatau lava ona i ai i so o se tagata soifua. O lona uiga, e leai se mea e ta'u o le le lagona. Aua o le faamoemoe lea o taliga i le foafoaga paia ina ia faalogo ma lagona. Peitai ua mafai i le vaai faamataupu silisili, aemaise o gagana faa faatusa o le olaga o aso faisoo, ona i ai le mafaufauga o le i ai o taliga ae le faalogo. O se faauigaina faigofie o lea manatu – e lagona e taliga peitai o le le usitai ma iloa le mea lelei e tatau ona faatino.

O le saito lava ia ua faatusa i ai Afioga a le Atua. O le Afioga ua aumaia ina faalogo ma lagona e tagata e ala lea i lo latou savavali ma faia le finagalo o le Atua e pei ona tusia.

O ata eseese o eleele na lulu ai saito, ua iloa ai vaivaiga o le tagata faalogo. O le tagata e faalogo ae le lagona, o le tagata e faalogo ae ua na o sina taimi, o le tagata e faalogo ae a fetaiai ma faafitauli ona vave lea ona le lagona, ma le tagata e faalogo ma lagona ona faia lea.

O se aoaoga lelei foi lea mo tatou le autalavou, Ua tele fanau ua saisaitia ma ua le iu lelei olaga ona e mafua mai o le le faalogo ma lagona lelei le fautua a matua e ala ile usitai ma faatino. E le iu lelei se tamaitiiti e fai ona taliga ae le faalogo. O le leo mai matua, o le tuualalo foi lea mai le Atua. Afai tatou te le lagona le leo o tatou matua, o lo tatou teena foi lea o le finagalo alofa o le Atua.

---

**ASO SA:**           **30 IULAI 2023**

**MATAUPU:**       **FAAMAONI I MEA ITI**

**Tusi Faitau:**      Mataio 25.14 - 30

#### **Faatinoga o le Mataupu:**

- E fautuaina lau susuga i le Taitai ina ia **Faatino le Tala**
- Vaevae le Autalavou i vaega e lua ona tofu lea o le Vaega ma le faatinoga.
- I faatinoga, e fautuaina le fa'aaogaina o tupe (tala ) e sui ai taleni

- Ia tufa tupe i auauna, ona pule lea o le auauna po o le a lana galuega ma se atina'e sa fai ai ua mafai ai ona toe maua mai isi tupe (*fataitaiga – pe na fai ai sana toga kukama ona faatau lea ma toe maua mai ai isi tupe*)
- O mea na fa'aaogaina ai tupe o le mea togia o le faatinoga, ma e tatau ona eseese uma auala na faaaogaina ai tupe na tufatufaina.
- O le faamoemoe, ia manino le galuega na fa'aaogaina ai tupe na tufatufaina ma ua toe maua ai isi tupe. (*Galuega lava o lo o faatino i totonu o aiga ma nuu i le taimi nei*)
- O galuega ia e aumaia ai se feau o le faamaoni i mea iti.

#### **MANATU MO LE TAITAI:**

Faatāuaina e Iesu le upu “faamaoni.” O le tagata faamaoni, o le tagata e faatuatuaina i mea e fai. E faamoemoeina auā e tumau le faamaoni. Afai o oe o le tama ma le teine aoga, o le tagata faigaluega, po o le tausi aiga, o le finagalo o Iesu ia tumau lou faamaoni. O nai mea itiiti, o le faamaoni ma le faatuatuaina, tatou te manuia ai i mea tetele, o lau aoga, o au galuega, aemaise o lou aiga. Tāua le faamaoni i nai mea itiiti.

E lē tele ni taleni, ma e lē tāua foi ia Iesu pe ta'i fia ni taleni. Pe 5, pe 2, pe 1 foi le taleni, na ta'u itiiti uma lava e Iesu. A'o le finagalo o Iesu, ia faamaoni i mea itiiti. Ese le manaia o upu a Iesu, auā e lē o fai mai Iesu: “Le auauna lelei e, ua e lelei atoatoa,” auā e leai se isi e atoatoa. E lē tāua foi se atoatoa, ae o le faamaoni. Po o le ā so ta vaivai, ma so ta lē atoatoa, pau le mea o finagalo iai Iesu, ia ta faamaoni.

Aua nei e manatu faatauvaa ia i tatou lava ma lo tatou ola a'oa'oina. Leaga o lea e tapuaia lou ala usu i le aoga,,,O la

leoleoa nai matua, ina ne'i e tagi mai i se i'a ae avatu ai se ma'a... E itiiti lava se mea tatou te sao atu ai le ola e faavavau. Fetalai Iesu, na ou fia ai... na ou fia inu. E itiiti lava, na o sina mea ai ma sina ipu vai, pau na o mea itiiti tatou te sao atu ai le ola e faavavau. A o mea itiiti foi nā tatou te lē sao atu ai foi. Na afio mai Iesu i se auala maualalo auā na finagalo le Atua i se ala faatauvaa e faatino ai lona finagalo.

#### AOTELEGA:

O le lu'i lea mo tatou le Autalavou: Fetalai Iesu, "Ua e faamaoni i nai mea itiiti – ulufale mai ia i le manuia o lou Matai." Tupulaga Talavou e, e taua lo tatou faamaoni, po o e aoga po o le a lava si galuega itiiti o e galue ai. Ia tatou faia ma le faamaoni.

---

**ASO SA:** **6 AOKUSO 2023**

**MATAUPU:** **AGANU'U**

#### **AUIVI MO LE FOLAFOLAINA O NISI O MEA NEI.**

O lenei mataupu o le a mafai ona toe aumaia ai le gasologa, faatulagaina ma le folafolaina o fa'aaloaloga i nisi o aganuu ma mea e tutupu i le olaga faa-Samoa. E atulasi Aganuu ma Agaifanua a si o tatou atunu o Samoa, ma e i ai foi le manatu o lenei mataupu e eseese uma foi faaupuga ma le vaogagana e fa'aogaina i lea mea ma lea mea. O le faamoemoe foi ona ua pei ua faasoloatoa le faaaogaina o le gagana i nei ona po. O nisi la nei o Agaifanua i totonu o le lotoifale faa-le-Aganuu o le a mafai ona agai i ai ni sailiiliga i faaupuga faapitoa e patino mo le folafolaina,

aemaise o le auivi ma ni manatu i le gasologa o le folafolaina o fa'aaloalo i mea nei.

#### **1 - Sua**

#### **2 - 'Ava.**

##### ***1. Sua***

E i ai le manatu a le sailiiliga o le fa'aaloalo tupito lea ma le taatele a le atunu. O lenei foi fa'aaloaloga e faatino lava i soo se ituaiga taligamalo i nei ona po. Ia po o ni fa'aaloaloga foi i ni mea e tutupu i totonu o aulotu ma so o se faalapotoptoga, ae maise lava i taimi o maliu. E pei lava ona i ai faavae o isi faaaloaloga, e faapena foi le *sua*. Sa taoto lava lona faavae ma lona faasologa, e ui lava ina ua tele fesuiaiga i upu e fai, ae le mafai ona aveesea ai le taua o le faaaloaloga. Ua ta'uua lenei faaaloaloga o le FAATAMALII.

##### **Totoga o le Faatamalii:**

Vailolo(Niu) – Ua taatele i nei aso suiga ua i ai, ua fa'aogaina i ai faguina po o apainu e sui ai le niu, e i ai ma lona momono(\$5) ma le ie papalagi siiatoa. O le itu muamua lea tatou te vaavaai i ai aua ua tatou le mautinoa po o le a le ufitai o le sua talisua po o le sua taute lea ua aumai.

##### ***2. 'Ava.***

O le 'ava o le fa'aaloalo lea e feiloai pe taumavae ai foi ni mafutaga, po o le nuu. Ia po o se faamoemoe foi sa feagai ma se aiga po o se nuu. Afai laua e sauni i le galuega lenei o le folafolaina o 'ava. O nisi nei o itu e ao ina e malamalamalama lelei iai.

- a) Faalupega o lou nuu
- e) Faalupega o le nuu lea tou te Malaga i ai.
- i) O ona malaefono ma maota taua
- o) O le faasologa masani o le folafolaina o ‘ava mai le amataga e oo i le iuga.

E talitonu foi le sailiiliga, e leai lava foi se sese pe afai tatou te amata lava i le folafolaina o ‘ava e aunoa ma se folasaga amata, e pei ona masani ai le atunuu e ui lava ina e le o lena le faavae o lenei galuega. O nisi foi ia o auala e lavea’iina mai ai i le soona fa’aaogaina o isi mau upu e le talafeagai.

O sina faataitaiga – “*O le a fagafua ia lou nofoaga ia ae magalo sou leo, ae sei ou tautalai fua o malo ma fua o faaaloaloga, i se ava na aliitaeao mai ai le paia i le aiga sa Tuala ma Usoalii, a o se usu fa’aloalo i le matua ma le falefitu. Ia sila malo maia le paia o le Aiga, a o se maimoa i le Tuua ma Salafai – o lea ua i lumā ava sii le fa’aloalo lea, o le a ou taumafai e folafolaina atu:.. Ua i ai le latasi, luplesina, ava tugase ua mago faalā lelei. A ao le malo ua fau ma soloi. O le a faia i ai lau pule aua ua lava ma totoe.*” Ona faasoaa lea o lau pule seja maea. E manatu lenei sailiiliga e leai lava se sese aua o upu tautino, upu tuusao ma upu moni e faataau lava i lea fa’aloalo. Peitai e pei ona ta’ua ua tele suiga i nei aso, ua matua tapena le Failauga e folafola ‘ava. Ua aumaia tupua ma maota o le nuu, ae tainane le itumalo, ua leai lava se mea e gole. O le a le afaina lea leaga o suiga o nei vaitau. O le mea moni e sui lava faiga ae tumau pea ona faavae.

- Na mafai foi ona maua mai lenei sailiiliga nisi manatu e auga i nisi o ‘ava e pei o le ‘AVA FELAFOAI. E manatu lenei sailiiliga ua tele ina fa’aaogaina e le lautele upu

masani o lo o fa’aaogaina i le ‘ava masani o feiloaiga, taumavaega, tauaofiaga, aemaise o le feafioai ma le fetaaloloa’io le mamalo o le Atunu. O le Ava Felafoai, e le fa’aaogaina pe taua foi o se ava, aua foi o le ‘ava o taua. O le uiga lena o lona igoa – e lafo atu e le tasi itu taua i le isi itu taua, toe lafo mai, lafo atu. E pei o se mea e faalani ai se taua, e masani tele le Faleupolu i faiva o matematega. O le ala lea o le aumai ai i totonu o se usu a le nuu, ona e faapea o latou manatu – Ave pea sei o tatou iloa ai pe mateia e le Faleupolu a le nuu la tatou tupua. O le ala lena o le aumai, ae le aumaia i se usu lenei ‘ava, aua o le ava usu lava ia o le fa’alia lea o le feiloaiga mamalu aemaise ai o le taulaga osi i le Atua soifua. Peitai ua tuufafeagai ma le faamoemoe o lo o ta’ui i le uiga o le ava felafoai.

- E i ai foi se tasi o ‘ava ua faaigoaina o le Matimati mai Vasa. O le ava lea e faatoa ta’ua lava e se folafola ava pe afai o le ava lea o se ava o so o se Malaga. Ae leo se ‘ava o se alii taeao ma se usu. Vagana o se tagata na alu Malaga ua foi mai e pei o le Faifeau pe alu atu i se isi nuu, ona foi mai lea ma aumai ni ‘ava, o ‘ava tonu lava na e ta’ua o le Matimati mai Vasa. Tusa lava pe lei asaina e le Faifeau le vasa, a o le faamoemoe sili o le Malaga na alu ua taliu mai ma le manuia.

### **FAASOAGA O ‘AVA:**

Ia manatua e muamua lava le inati o le tanoa, pe afai o se Malaga a le autalavou, ona sosoo lea ma ‘ava o le ipu a le Faifeau, sosoo ai le Peresetene, ma isi mautofi o le autalavou. Afai foi o se malaga a le nuu, e muamua lava le inati o le tanoa, sosoo ai ma le

Alii taua, sosoo ai ma isi alii, ona mano a loa lea, e le pulea ni ‘ava i ni tulafale.

### **Upu Mulimuli:**

- E pei lava ona ta’ua muamua, *e sui faiga ae tumau lava ona faavae*. O le manatu maualuga o lenei mataupu o le toe sailia lea o faaupuga e fitoitonu i lea faamoemoe e pei o nisi o faamoemoe ua ta’ua i luga. Ona ua pei ua leai se pa puipui o le fa’aaogaina o faaupuga e folafola ai le tele o fa’aalaoaloga. Ina ia malamalama lava ala o faaupuga e ave i lea fa’aalaoaloga, aua o nei vaitau ua leai se manatu mamafa i le uiga loloto o nei mau faaupuga ua tele ina fa’aaogaina.
  - Ia tuu le avanoa i le au tootoo uli o le Autalavou e fesoasoani ai.
- 

**ASO SA:**                   **13 AUKUSO 2023 ( Aso Sa Tamā)**

**MATAUPU:**               **TAMĀ SAILI MALŌ**

**Tusi Faitau:**           Luka 19:1 - 10

### **Faatinoga o le Mataupu:**

- Ia faitau faatasi le Tusi ua tuuina atu
- Ia faatalanoa faatasi le mataupu, pule lau Susuga pe auala fetufaai pe auala tuu sa’o

### **MANATU MO LE TAITAI:**

O le tala lenei ia Sakaio ua tatou iloa ai le alofa o le Alii Faaola e tatala mo so o se tagata. O le alofa le faatuaioia o Iesu Keriso, e aofia ai le tagata Iutaia ma le tagata o nu’u ese, o le tagata kerisiano ma le tagata e lē kerisiano.

O taimi o puleaga a Roma sa matuā fa’amalosia ai le tasi’i o lafoga ma tau o oloa. O se vaitau foi sa tele ai le oi ma le taugatā o le soifuaga aua e leai lava se isi e na te agaiā pulega malolosi a Roma. O nei faiga sa pei ai e taitai faai’ā mātau le tele o atunuū sa pulea e Roma.

O faiga nei sa galue ai Sakaio o ia o se Ao Lafoga. A o nisi ia mafaufauga e mafua ai ona tetee e Iutaia tagata Ao Lafoga, aua e manatu o nisi nei o tagata agasala. O le ala lea o le tupu o lo latou tamaoaiga, ona e ao faasili i lafoga a tagata, ona ave lea o le isi vaega i totonu o le malo, ae tuu le isi vaega i totonu o le taga. O ō latou manatu ia ua latou tusieseai Sakaio mai lo latou talitonuga faalefaatuatua, ma ua manatu ai lava o Sakaio o le tagata agasala.

Peitai, o tagata ia na fetalai manino ai le Alii Faaola – “*Ou te lei sau mo e malolo, a’o e mama’i*” O le tala faimai ina ua ui ane o ia i Ieriko, ona lolofi ane lea o tagata ia te ia. Na faalogo iai le tamā lenei o Sakaio, ona naunau lava lea e alu e fia matamata i le tagata e suafa ia Iesu. O le tamā lenei o Sakaio o se tagata e pu’upu’u. Sa faigatā ona iloa tino e Sakaio Iesu ona o lona pu’upu’u. Le ala lea na ia momo’e ai ma a’e i le sukamoru o lo o i luma atu o le auala.

O le fesili – Aisea ua nanau ai lava Sakaio e fia matamata ia Iesu? Aua afai ua tele lona tamaoaiga ma tele ana oloa – O le a la le isi mea o lo o manatu ai?? Afai foi ua matua lona soifua ua tau leai

sona malosi – Aisea ua taumafai ai lava e a'e i le laau? Ioe! Po o le a lava le tele o le oa ma le tamaoaiga, e le taitai ona faatusalia i ai le faamalieina o le oa ma le tamaoaiga o le malo o Iesu Keriso??A o le ā foi se malosi o totoe o si toeaina o Sakaio. Ua ia tuu atoa e saili ai Iesu e ala i lona a'e i le sukamoru.

Pe na iloa tino mai ea e Iesu Keriso gaioiga ia a Sakaio??O le ata o le mana saili mai o Iesu mo e fia maua lona malo, e le faigata ona ia iloa mai.O Iesu e na te silafia mea e oo i ai manatu e lililo i manatu faaletagata. E saili gofie mai e Iesu le tagata o lo o saili atu mo Ia. Ua talia fiafia e Iesu Sakaio e la te malōlō i lona fale, auā o le faamoemoe lea o le galuega a le Alii Faaola na afio mai ai ina ia faaolaina ē ua agasala. O le faaolataga lea ua oo mai mo lenei tamā o Sakaio, aua ua ia tufatufa atu ana mea i ē matitiva, afai foi na ia ave i se auala pepelo e na te taui atu taifā, ina ua pupula ona mata faaleagaga ma iloa ai o ia o se tagata sa leiloa i le finagalo o le Atua. Ta'ua le taui taifa, o lona uiga o le ave atoa. O le agaga o Sakaio e na te ofoina atoa lona alofa mo isi tagata.

O se aoaoga foi lea mo tatou le autalavou, o le aso lenei e faamanatu ai nai o tatou tamā. Ia e alu atu i le fale ona e fai lea i lou tamā – Ia avea oe ma tamā e ala mai ai le faaolataga mo le Aiga in ua ia saili ma talia le Alii Faaola, pei ona saili o le tama ia Sakaio. O Iesu Keriso, na ia saili mai i tatou e ala i lona soifua na ofoina mai ma le atoatoa, ina ia toe avatu le lalolagi ua leiloloa i faiga a le agasala.

.....

**ASO SA:** **20 AUKUSO 2023**

**MATAUPU:** **NASERI A LE ATUA**

**Tusi Faitau:** Faamasino 13: 1 – 5/Numera 6: 1 - 12

**Faatinoga o le Mataupu:**

- Ia faitau faatasi Tusi faitau ua tuuina atu mo le Mataupu
- Ia faamalamalama e Lau Susuga le uiga o le upu Naseri
- Ia faafesootai le Naseri i le **tama ma le teine talavou e tatau ona ola ia Keriso.**

**Uiga o le Naseri**

O le naseri, o le tagata ua vavaeeseina po o ua faapaiaina mo le Alii. O le tagata ua avea ma Naseri e le tatau ona inu i se uaina, e le oo foi se tafi i lona laulu, ma e le tatau foi ona pa'i i tino o tagata oti. I le tusi a Numera o lona mataupu e 6, o iina o lo o fetalai ai le Alii ia Mose, i tulafono ma mea e ao ona faia e so o se tagata ua filifili e fai o ia ma naseri.

**MANATU MO LE TAITAI:**

E 40 tausaga o faapologaina Isaraelu e le nuu o Filisitia, ina ua latou toe amio leaga ma o ese mai le Atua. O le taimi lea na faailoa mai ai le agelu i le toalua o le tagata e igoa ia Manoa, o le tagata e mai le nuu o Sora, o le ituaiga o Tanu. Fai mai le fetalaiga a le Atua e tauala mai i lana agelu. “Faauta mai o oe e pa, e te le i fanau o le a e to ma e fanau se tama tane”. O le toe foi faalua mai o le fetalaiga a le Atua, ua faamautuina ai e Manoa, e moni lava si ona toalua. O lea na ia osi ai le taulaga i le Atua. Na fanau mai le tama o Samasoni, o ia lava o le naseri mai le Atua ina ia faaolaina lona nuu mai faiga le alofa a Filisitia. O se tama malosi, ma e faatuatua tele i lona Atua.

O Samasoni o le naseri i le Feagaiga Tuai, peitai i le Feagaiga Fou na maua ai foi e Maria le perofetaga lava lea e tasi. O le a to oe ma e fanaua se tama tane, e te faaigoa ia te ia o Iesu, o lona uiga o le Faaola. O Iesu Keriso o le naseri o le Feagaiga Fou, o lona soifua, ua faaolaina ai le lalolagi uma. Tamaiti, ia avea i tatou ma naseri, e fiafia mai i ai le Atua, e ala i lo tatou faia o amio lelei ma le amio mama i aso uma.

#### **Fesili e Tatala ai le Mataupu:**

- O le a le uiga o le tagata ua avea ma Naseri a le Atua?
  - O a ni tapu ma ni mea e le tatau ona faia?
  - O le a le uiga o le tagata ua ola ia Keriso?
  - O a ni mea e le tatau ona faia e le tagata ua ola ia Keriso?
- .....

**ASO SA:** **27 AUKUSO 2023**

**MATAUPU:** **TAALOGA MATEMATE I LE TUSI  
PAIA (F/TUAI)**

#### **Faatinoga o le Mataupu:**

- Ia vaevae le autalavou i vaega e lua ona fai ai lea o le matematega
- O fesili ua tuuina atu e le o ni fesili e faigata tele
- O le mea e fia tuliloa o le vave o le mafaufau o le talavou e manatua ai tali o fesili nei

#### **FESILI:**

1. O ai o Kaino ma Apelu na mu lana taulaga? (Kaino)

2. O ai le igoa o le tinā o Isamaeli ? (Akara)
  3. O fea le nuu na sola i ai Iakopo ? (Patanarama)
  4. E fia tausaga na auauna ai Iakopo ia Lapana ? (20 tausaga)
  5. O fea na maua ai e Iosefa ona uso ina ua alu e ave a latou meaai? (Totana)
  6. O le a le uiga o le igoa Peteli? (Fale o le Atua)
  7. O ai igoa o faatosaga o lo o ta'ua i le Esoto 1:15? (Pu'a ma Sepela)
  8. O le a le uiga o le igoa o Mose ? (toina a'e i le vai)
  9. O ai le uluai tupu o Isaraelu ? (Saulo)
  10. O ai igoa o atalii o Eli? (Hofeni ma Fineaso)
  11. O ai igoa o toalua o Elekana? (Hana ma Penina)
  12. O fea le nuu o Iopu? (Usa)
  13. O ai le igoa o le tuagane o Eseta (Moretekai)
  14. O le a le uiga o le Ato Laau? (O le Atua auai)
  15. O ai le igoa o le Tamā o le toalua o Mose ? (Ietero)
  16. O fea na tuuina ai e le Atua tulafono ia Mose ? (mauga Olive/Horepa)
  17. O le a le uiga o le igoa o Sara? (O le sao tamaitai)
  18. O le a le faia o Aperaamo ma Lota? (Atalii o lona uso)
  19. O a manu e lua na faagaganaina e le Atua ? (Asini ma le gata)
  20. O le a le tupua a Samasoni? (na alu atu le mea e ai i le ai mea, na alu atu mea suamalie nai le malosi)
- 

**ASO SA:** **3 SETEMA 2023(Aso Sa Tala Lelei)**

**MATAUPU:** **TAUTIGA I LE TALA LELEI**

**Tusi Faitau:** 1 Tesalonia 1: 1 - 10

### **FAATINOGA O LE MATAUPU:**

- Faitau le Tusi filifilia o le mataupu
- Ia faamatala pea e lau susuga le Taitai le mataupu pule oe po o le auala tuu sa'o po o le auala fetufaai.

### **FESOASOANI MO LE TAITAI:**

O le Tala Lelei i le Ekalesia i Tesalonia sa muai toto e Paulo ma Sila i le malaga lona lua i le 51 tausaga ina ua tuanai ai le Toetu ma le maliu o le Alii Faaola. (50AD). E le i malu'ia le ola tala'i o Paulo ma Sila i tulafono ma sauaga a Roma. O le 'auga lava sa fai ma ta'imuaga o le savali - o le **Tala lelei i le Keriso toetu**. O le tala e faapea na sosofa lava e Paulo le ute (*main place of worshipping*) o le talaiga e ala i le ulufale solo lea i malumalu o Tesalonia. E ui i le tala lasi o tapuaiga i Roma, ae sa faaoefiofi atu ai foi e Paulo ma le Tala i le Keriso Toetu. Na alofagia le talaiga ma ua amata ona sosolo a'a o le Tala lelei, ma ua toatele foi Agaga ua laveaia i a'a malolosi o le Talaiga.

Na i ai lape o le galuega tau amata a Paulo ina ua tilofia e le puleaga a Roma. Ua fausia ma faatuina ni alafua ma ni aulape o tapuaiga i malumalu, ma avea ma ala e tapu ai le talaiga faakerisiano a Paulo ma Sila. O nei aulape e faapea e faasaina ai ni Misionare e autovaa atu i Tesalonia ma nisi talitonuga fou ona toe ulufale i totonu o malumalu. Ae e lei avea nei aulape ma ala e solomuli ai le sa o le Tala Lelei, na taualo pea e nei auauna totoa. Ua saili auala pea i laua ma i'u ai ina la maua se fale o le tagata e suafa ia Iasoni. O si nofoaga pu moomoo lena sa faaaauauau ai le faamiliina o le fatu o le tala lelei i Tesalonia. O avanoa na maua i

le fesoasoani o le Agaga, o le mautinoa lea e tatou te iloa ai e le oge auala le Atua.

Peitai o le mea e i ai le lelei e taumulimuli ai foi masei. Na toe alia'e nisi o faafitauli aua ua matua tulituliaupu e nisi le Tala Lelei. Ua faalogo ai nisi o Faamasino ma Faipule ua pei ua faalavelaveina a latou talitonuga i le Tala Lelei o lo o molimoli atu e Paulo ma Sila. Ua amata ona faapotopoto tagata Iutaia o lo o salalau i totonu o Tesalonia ma ua tupu le Tala lelei. Ona taupule ai lea o Faipule ma e maualuluga ina ia ave se feau i le Emeperoa Sili e aumai ai se faatagaga sei o latou sailia ai ma molia ai tagata o lo o aumaia le talaiga faakerisiano. Ua faalogo ai Iasoni, ma ua manatu ai o le a ia auina ese atu faalilolilo Paulo ma Sila. Ona tuua ai lea e i laua o Tesalonia i le po. Na o ese i la'ua ma le fiafia tele aua ua i ai aiga o le Tala lelei i totonu o Tesalonia, o i latou ia o le a toso le upega o le Tala Lelei aua ni agaga se tele.

A o i ai Paulo i Korinito , na toe foi ane ai lona atalii faa-leagaga o Timoteo sa i Maketonia. O Timoteo lea na sau ma le tala mai i le Ekalesia i Tesalonia o lo o alualu pea i luma lo latou loto atu i le Tala lelei. Ona avea lea o le tusilima a Paulo e fai ma faamalosi ma saga faamanatu pea ia Tesalonia – **e le o se afu e pau fua lo latou tautiga i le Tala lelei, e ala i le faatuatua ma le faamalosi i le alofa ma le tumau pea i le faamoemoe i le Alii o Iesu Keriso.**

O lo o silafia lelei e Paulo le feagai o nai tagata o le Ekalesia ma sauaga, a ua faamalosi pea Paulo e mavae sauaga ae tumau lo latou manuia i le Tala Lelei. E taui foi e le Atua i latou o lo o ua faapuapuagaina.

## Fesili Tuliloa:

1. O a ni ala na faigata ai le galuega talai a le Apostolo?
2. O le a le Tala Lelei o lo o talai e le Apostolo?
3. O a ni itu o lo o faigata ai le Tala Lelei i nei ona po?

**A'OA'OGA :** Ia tatou faamalolosi ma onosai e atiae le Tala Lelei ia Iesu Keriso, auua saunia le taui tele mo i tatou.

---

**ASO SA:** **10 SETEMA 2023**

**MATAUPU:** **VALAAUINA**

**Tusi Faitau :** Luka 5:1 - 11

O le valaauna e mafai ona faapea o tiute ma tofiga ua galulue ai, ua mautinoa foi e eseese uma foi valaauna po o tofiga ua tatou galulue ai. E mafai foi ona faapea o le ola a'oa'oina o le tamaitiiti o lona foi lea valaauna i le vaitaimi lea o le soifuaga. E ao ai ona faamaoni i lona ola aaoaina i le poto salalau. O so o se tofiga lava o le valaauna uma lava mea uma.

### **Faatinoga o le Mataupu**

- Faitau le Tusi Faitau
- Faatalanoa le Autalavou i le uiga o valaauna

### **MANATU MO LE TAITAI:**

O Simona o le tasi lea o Tautai matapalapala o le tai ma le vai o Kalilaia. O lana lea galuega ua masani ai. Ua na tofo foi i le le

atoa o i'a i lona vaa. O lea faatoa a'e mai lana faatamasoaliiga na alu ai le po atoa o tau saili se ia mo ia ma lona aiga. E taula atu le vaa o Simona, ae oso ai luga Iesu ma a'oa'o atu i tagata.

E lauga Iesu a o la lava e tautulimoe ai ma Simona, e tau taofiofi le vaa. Fiafia Simona ina ua maea le lauga a Iesu, peitai na liliu atoa e Iesu le fia malolo o Simona ina ua fetalai Iesu ***ina ia tuutuu i le loloto le vaa ma tuuina ifo ai le upega.*** Na tau solomuli lagona o Simona ona ua alu le po o fagogota e lei maua lava se ia se tasi, a o lea foi o le a toe o, a o le taimi foi o le a o ai o le susulu o le la, e seasea maua ai ni i'a. Le silafia lea faa-tagata Tautai o Simona, o se mafaufauga e talafeauga foi e tusa o le manatu o Simona o ia o le tagata faifaiva, ma Iesu e le o se tagata fagota.

Faimai le tali a Simona, **A ona o lau fetalaiga, ou te tuu ifo ai le upega i le loloto**,..,E lei toe manatu a Simona e toe maua se i'a. Ae ona o le usitai o Simona i le faatonuga a Iesu, lea na afua ai.

O le tala na le mafai ona toso a'e i luga le upega ona o le tele o le i'a. Na suia atoa e Iesu le atamai faa-tautai o Simona. O le ao e le maua ai ni ia i manatu o Simona, lea ua tau masae ai le upega i le mamafa o ia. Le iloa Faatagata tautai o Simona o le loloto e alu atu gata i le taele o le ilititai. A o lalo atu o le taele o le ilititai o iina o lo o taoto ai le penina taugata lea e iloa atu e Iesu. O iina o lo o i ai le mana faatautai o Iesu. E le mafai ona iloa atu e Simona sei vagana ua usitai ma mulimuli ia Iesu. E gata lo tatou iloa, a'o le tofamanino a le Atua e le masuesueina.

Ua faia le vavega ina ua i ai faatasi Peteru ma Iesu i lana galuega masani o le fagota, tupu le vavega fa'aaoga ai lona upega, vavega i totonu o lona lava vaa. Lea la e faapea ifo ai Peteru ---O ai ea a'u

nei le tagata agasala ma le faatauvaa??? Ua afio faapitoa mai ai Iesu

Peitai e le o le finagalo lea o Iesu, e tusa o le manatu o Peteru. O lagona faatauvaa ma le tulaga maualalo o le tagata, e fa'aaogaina e le Atua. A o le faamoe lea o Iesu mo Simona po o Peteru - **Aua e te fefe, e amata i nei ona po ona e maua tagata, ua tutu o latou vaa, ona latou tuu ai lea o mea uma a e mulimuli atu ia te ia.. VALAAUINA**

### Fesili Tuliloa

1. O le a le suiga o le valaaufina o Peteru?
2. O le a se uiga o le upega ma i'a o lo o maua mai ai?
3. O le a se valaaufina o lo o e galue ai i le taimi nei?
4. A o le a foi se valaaufina o lo o e mafaufa ai i le lumanai?

### AOTELEGA:

E fa'aaogaina e le Atua lo tatou faatauvaa. O a tofi ma tiute ua valaaufina i ai lo tatou ola. O valaaufina uma mai le Atua. E leai a foi se tiute e vale i le silasila mai a le Atua. Pe ofisa pe fai falaoa, pe faiaoga, fai maumaga pe laga fala po o le a lava. Aua tatou te manatu faatauvaa i o tatou valaaufina. O tofiga uma mai le Atua. O tiute e tutusa uma lona tau i luma o le Atua e ala i le faamaoni. O le faatauvaa o Simona, na le toe faagota ai mo ni i'a, ae ua ia faifaiva mo agaga o tagata. E ala i le avea ma so'o o Iesu.

---

**ASO SA:** 17 SETEMA 2023

**MATAUPU:** FA'AALI MAI E LE LAGI

**Tusi Faitau:** Salamo 19 :1 - 11

### **Faatinoga o le Mataupu:**

- Fautuaina le faatalanoa faa suesuega i le Tusi Paia(Bible Study)

### **FESOASOANI MO FAIAOGA:**

O le Salamo sa faitauina o lo o tautino ai e le Fatu pese le matuā silisili ese o le Atua ua fa'a-ata mai e le fetaliaiga ma le gasologa o mea o le foafoaga paia. Ua foliga mai ai o lo o i ai lava le lagi i lugā, o le lagi o lo o afio ai le Atua silisili ese. Lea ua faaali mai ina ia iloa ai e le tagata o le Atua mamalu o lo o afio o ia i le lagi. Ua viia foi o Ia i ana lava galuega mamana.

**(F 2 – 4)** - E i ai le manatu o le isi lea vaega e tupuga mai ai mafaufauga o le fatu pese. O lona i ai i le po e na te vaaia ai masina ma fetu o le lagi, o le vanimonimo i le ao, e mavae atu foi lea po ma lea po, a ua leai lava se fili e lamatia le soifua ma le ola, e le gata ia te ia ao ana mamoe. Lea la ua fatu e le Fatu Pese le alofa o le Atua o se tagata(personified) e le lagona lona siufogga, a ua ta'u mai e foliga ma ana galuega lona mamalu silisili ese e le gata e viia ai o ia i le lagi ae faapea foi i le lalolagi. O le ata manino foi lea ua tatou talia lautele i nei ona po. O le fesuiaiga o le tau, o le timu ma le la, alu atu o lea aso ae sau le isi aso, o le iu manuia o feau ma galuega o lea aso ma lea aso. O le ao ma le po, o le la masina ma fetu. O le leo le lagona lena o lo o fa'aali mai ai le Atua ia i tatou. A o le leo foi e o'oo'o i tuluiga uma o le lalolagi.

**(F 5 – 6)** – Ua talanoa le Fai Salamo i le fale ie ma le la, o le ata o le paologia e faatusa i ai le fiafia o le fitafita tau ma le tagata galue e mapu ane ai i le mea paolo. Ua tautala mai le Atua e ala i lana la,

peitai e le o le manatu o le Fatu Pese e le o le la a o le paolo o le mea foi e faia e le Atua mo lana tagata. O le ata o le fale ie, ua faatusa i ai teuga a le faatoa faiava ua sau mai lona afeafe le ilaila ma le matagofie, pe a taia e le la le faleie i lona ilaila ma pei e sesega i le vaai. A o le la o le ata alu mamao lea ma le malosi o le alofa o le Atua mo ona tagata. Ua faatusa i le tamoe a le fitafita malosi e le malolo. O le gagana mai foi a le la e leai lava se mea e lilo ai i ona ave malolosi, o le uiga foi lea o le silasila mai a le lagia i tatou.

**(F 7 – 11)** – O lo o fa'aauau pea le gagana a le Fatu Pese o lo o natia ai pea le Atua, a ua ia fa'aaogaina pea ana galuega e ala i lana UPU, ma e foliga mai o lea ua i ai le leo o le Atua. A silasila i ai e le o fa'aaogaina e le Fai Salamo le suafa o le Atua, a o le Alii. O lea ua faa-gaganaina e le Fatu Pese le upu a le Atua..

O nisi ia o feau taua o lo o ua fa'aali manino mai ai le lagie tusa o mafaufauga o le Fatu pese o Tavita. O lo o ua gagana mai ai le lagie i mea o lo o i ai ma le mamalu o le Atua, ae le gata i lea o lona finagalo mo ona tagata faatuatua. O se pese foi ua tatau ona tatou pepese ai e saga viia ai lona alofa iai tatou le fanau. E tatau ai foi ona tatou matua talitonu ma le atoatoa i lea mamalu ua gagana mai mo i tatou. E ui ina pei e faatauvaa ia i tatou le aulia o lea aso ma lea aso ma le tele o mea o le foafoaga o lo o tatou ola ai, peitai o le alofa lena o le Atua o lo o auai mai pea.

O le fa'aaliga manino mai le lagie, lea na afio mai ai lona Alo pele e toatasi, ina ia tatou iloa mautinoa ai lona alofa faamaoni mo i tatou lana fanau.

**ASO SA:** **24 SETEMA 2023**

**MATAUPU:** **MATITIVA I LE AGAGA**

**Tusi Faitau:** Mataio 5:1 - 3

**Faatinoga o le Mataupu:**

- Faitau faatasi le Tusi Faitau
- Faatalanoa le mataupu, ia taiala i fesili ua tuuina atu i lalo

*Amuia e matitiva i le agaga aua e o latou le malo o le Atua....*

**Fesili 1: O le a le uiga o le Amuia i upu a Iesu?**

*Amuia e,,Ese le manaia o le gagana a Iesu i upu o lo o tomua ai lana lauga. O le upu o lo o ua faanofogofie ai e Iesu le motu o tagata, leaga o le la e saofai atu ai ma le tusiupu ma le faresao o e o lo o tilotilo masae i le galuega tau amata a le Alii Faaola. O le upu e tafatasi ai le tataa solo o taliga o tufugauli. O le upu Amuia ua iloa mautinoa ai o le manuia. Aua e le faapea a Amuia – ona sosoo mai lea o le ma'i..Amuia oe ua e ma'i tigaina...Leai...*

O le Amuia i manatu o Iesu o le Amuia lea pe afai tatou maua le taamaoaiga faa-le Atua. O le tamaoaiga faaletagata o se manuia e tatou te maua ai suiga lelei ma le fiafia, a o le manuia foi e i ai le taimi aveesea ma faaleagaina ai. A o le tamaoaiga faale Atua, o le manuia e atoatoa ma tumau e faavavau. O le oa e le oo i ai se ele po o se mogamoga. Fatalai Iesu – *Ona olioli ai lea o outou loto, e le aveeseina foi e se tasi lo outou olioli.....*

## Fesili 2 : O le a le uiga o le matitiva i le Agaga?

E sosoo mai la i le amuia *le matitiva i le agaga*. O le matitiva i lona fa'aaogaina mai le gagana Eleni, ua le na o se mativa. O le mativa i le tino toe mativa i le agaga. Ai o le mativa lea e faamatalaina o le mativa masaesae sei tulou. A tatou fesagai loa ma le Atua, tatou te o ma lo tatou matitiva i le agaga. E matua gaogao ii o tatou tagata. Tatou te o ma lo tatou fia tausasami e fafaga mai tatou e le Atua. O le mativa e faatamaoagaina e le Atua, o le agasala e faamagalo e le Atua, o le mai e liua i le malosi. Leai a se tuufesili aua o le a ea e tatou te avatu ma le Atua pe afai ua gaogao o tatou tagata. Ioe! O le mativa i le Agaga ua o se eleele ua uma ona faamalūina mo faamanuiaga mai le Atua.

O le agaga o lo o faatatau i le agaga ua faatuatua ma faalagolago i le mea o le ola nei, O le agaga ua pulea i le lasi o mafaufauga o le ola nei...E pei ona ta'ua o lea e tatou te saili i le oa aua le manuia. O mea ia lea e tatou te tua i ai ma faamoemoe i ai. A o le uiga o aoaoga a Iesu aua nei avea ia mea e tele tatou te maua, e suitulaga ai le Atua. E taua le 'oa, ae sili ai ona taua le na ia aumaia le 'oa.

E i ai se tasi o tagata maumea i Peretania, o le tamaloa lenei na alu faatau uma ese ana mea, o fale , taavale ma mea uma, na o le ofu na pipii i lona pa'u na totoe, ona alu lea o le tamaloa lenei ua nofo i le nofoaga lea e ta'ua o Monastic...Faimai le tamaloa lenei ua ia aveesea uma ana mea, ae sei fa'aavanoa lona tagata mo le Atua. taua foi le mafaufauga o lenei tamā. Ai ona ua pei e felefele solo ona mafaufauga, ma ua tumu lona tagata i le agaga e toloa'i ai le oa faaletino. Ae ua leai se taimi mo le Atua...O mea e tutupu i le soifuaga nei, a maua se tupe feolololo ua tele foi mea e mafaufau ai, a tele mea e mafaufau ai, ua tumu lota tagata ma pei ai e

mamafa lota tino. Ae a uma nei se mea e mamafa i lota mafaufau, ona pei a lea e pau ese se avega mamafa ma pei e gaogao lota tino, o le ituaiga gaogao lena lea e mana'o iai Iesu. **O lona uiga e matitiva i manatu faale lalolagi, ae faa-avanoa le tagata ia mauoa i manatu faale Atua.**

Fesili mulimuli: E faapefea la ona tatou maua le malo o le Atua?????

---

**ASO SA:** **22 OKETOPA 2023**

**MATAUPU:** **LAGONA POPOLE**

**Tusi Faitau :** Mataio 6:25 - 34

### **Faatinoga o le Mataupu**

- Faasoa faatasi ma le Autalavou i le uiga o le popole, o a ni mea e tutupu pe a oo ina maua i tatou i lagona o le popole

### **Manatu Faatupu manatu i le uiga o le popole:**

Ua fetalai manino Iesu i le eseesega o mea ia e lua e pei ona i ai le faamamafa o lenei mataupu, o lo o aumaia ai ni upu tuu faafeagai se lua, O le *popole* ma le *fifia*. Tatou manatunatu loloto i uiga o nei upu e lua. O le *popole* e mafai ona faapea –

1. E avea ma lagona faatupu ma'i ai ia i tatou,
2. E avea le popole ma ala e taotaomia ai ou lagona,
3. Fai ma ala e faalavelaveina ai au galuega,
4. E afaina ai le va fesootai ma le isi tagata,

- Avea ma ala e tafieseaa ai le ola faatuatua i le Atua.

### **FESOASOANI MO LE TAITAI:**

O lo o faaauau pea le Lauga a Iesu i luga o le mauga e tusa o le mau a Mataio. O lo o ua a'oa'o mai ai Iesu ina aua nei popole i mea o le ola nei. O mea e 'ai po o mea e inu ma mea e nonofo ai. E le o le uiga o a'oa'oga a Iesu ina aua nei manatu i mea e 'ai po o mea e inu po o ni fale foi. Peitai o uiga o a'oa'oga ma le mataupu silisili o lo o aumaia e Iesu. O le aua nei avea mea a le tino ma mea e tatou te popole tele ai. Leaga o mea ia e foa'iina mai lava e le Atua, a o le ola ua aumaia e le Atua o le mea lea ua sili nai lo nisi mea. E tatou te saili ai i lona malo ma lana amiontonu.

O le faitauga o lenei o lo o sosolo mai i le fuaiupu e 24 o lo o fetalai ai Iesu "*E leai se tasi e mafai ona auauna i alii e toalua.*" O alii e toalua o lo o faasino i le oa ma le Atua. E taua le oa, peitai e sili ai ona taua Le na ia foai mai le oa.

Aumaia e Iesu nisi o vaega e le tatau ai ona popole ae fiafia.

- F25 – O le Atua o le puna ma le pogai o le ola ma le malosi. Aua afai na aumai e le Atua le ola ia i tatou, o Ia lava foi e na te tausia lo tatou ola. E le o le ola i le ai, ae ia ai ia ola. O lona uiga e le o faamamafa o lo o i mea e ai ma nisi mea, a o le faataua o lou tausia lelei lea o le ola mai le Atua. E mafai foi ona faapea ina nei o tatou popole i mea e ai, ona soona mafaufau lava lea i le 'ai, a o nisi ia o ala e tutupu mai ai faama'i ma maua ai i ma'i o le tino.
- F26 – E aumaia e le Atua mea e manaomia. Ua aumaia le ata o le manu e na te sailia se mea e nofo ai ma ni meaai, a ua ola fiafia i le siosiomaga ua faia e le Atua. Aua faapei

ona tausia e le Atua o manu felelei, ua latou ola fiafia i mea ua aumaia e le Atua. E le sili ea ona tausia e le Atua le tagata ua fai ma pule i mea uma o le foafoaga.

- F27 – E faasoaa mai e le Atua aso o le ola. O le ola fiafia e leai se popole o se tasi lea o vailaau aoga mo le soifua faaumiumi o le tagata. Aua o le popole ua avea ma faatupu gasegase i nisi o taimi ma vave ai ona puupuu le soifua. Ae a maua le fiafia pe aua le popole, o le a mafai ona maua le ola solo lelei ma le soifua manuia.
- F28 – 30 E faafouina i tatou e le Atua. O le Atua lava ia e ana mea uma ua ia i tatou. E faapei ona i ai o le atamai ma poto silisili ese ia Solomona e lei mafai ai lava e lona atamai ona ia faia ni mea tetele ma ni ofu mananaia mo ia. O ana mea uma o mea na afua mai i le tausiga a le Atua. O le malosi o le Atua na faafouina ai lona atamai ma lona mamalu ia Israelu.

Ua faamanatu mai foi mo i tatou le Autalavou, ia aua nei avea mea e 'ai ma lavalava ma fale ma mea e tupu ai le popole ia i tatou. O lona uiga aua tatou te tausili ma naunau i ia mea, a ia tatou naunau e saili le finagalo ma le amiontonu o le Atua. Ona tatou maua lava lea o le ola toofilemu ma le fiafia moni mai le Atua. O tatou o e ua faalupe o lumanaia o aiga, ua faamoemoe mai iai tatou le manua o aiga nuu ma le Ekalesia. O mea ia o lo o faamoemoe mai ai, ina ia maua ni galuega lelei aua le atinaeina o aiga i lona itu i fafo. O se mea e lelei tele aua o le amataga lava lea o lou ola tautua i le Atua. E taua ai lava lo tatou tausili ina ia maua meaai ma fale ma lavalava, a o le a'oa'oga o lenei aso ina nei maua le oa ma le manua ona faatuatuanai lea o le alofa o le Atua.

**ASO SA:**

**29 OKETOPA 2023**

**MATAUPU:**

**O AI IOSUA?**

**Iosua le Tauola:**

O Iosua o le tama na tupu mai i le a'a o le aiga o Efaraima (Num 13:8). O le tasi nei o taulealea mai le **toalasi o le aumaga** a Aikupito sa tuavae i ai Mose, a o tau fatifati mai se ala o le nuu o le Atua i le vao. O le ala-fati sa taitai mai ai e le ao faaniutu i le ao, ma le afi faaniutu i le po. Na vavao e Mose le nuu i le auvae mauga o Sinai, ae alu a'e i le tumutumu lea na tuuina ifo ai tulafono. E alu la Mose ae vaai mai o lo o i ai le taulealea o lo o tamoemoe atu i ona tua, o ia lea o Iosua. O se taulealea sa usitai ma faalogo ia Mose. O se taulealea sa taulamua. O se taulealea sa fa'aaoga lona malosi mo le Atua. O se taulealea sa vaai ona mata faalogo ona taliga, lima ma vae i ai faatonuga a Mose.

O le uiga loloto o ia mea – O Iosua o le taulealea sa ia asu le ipuvai ma tutu le afi auā le Atua e tauala atu ia Mose. Lea la ua moeiini atu Mose, a o lea ua tumu le ato a Iosua i faatufugaga o le galuega faa-ta'itai. Ua sauni Iosua e amo ato i faatufugaga na ala mai ia Mose. E au le tauola e au le fagota.

O le tulai mai o Mose sa fai lea ma faleaoga ia Iosua – o se taitai sa lalafo mai ai momoga faa-le Atua aua le galuega fa'aauau. E taua foi leaga o nisi taitai ua soona tuulafoai, ma ua le soa i le Atua le taitaiga, ona afaina ai lea o le galuega tuufaasolo e pei ona i ai le sosooina o le fau ma le fau i le va o Mose ma Iosua. E faapei ona soa i le Atua le taupulega a Mose, e manatu ua faapena foi le Agaga o le taitaiga a sauni atu i ai Iosua mo le fu'a faatinis e taunu'u ai le tamoeaga umi mo le nuu na folafolaina.

**VAAIGA LAUTELE**

Ua sauni Iosua ma le nuu e asa le vao filifili o le ala i totonu o Kanana. O le mea mautinoa e ui ona o le nuu sa folafolaina i ai e le Atua, peitai e toai atu Israelu o lo o aumau ai tagata. O le mau lava ia ua silafia lautele – O eleele ma fanua, o aseta taua ia e faamemelo i ai so o se tagata. E faapena foi le mafaufauga sa i ai latou sa nonofo i Kanana. E le faigofie la ia Iosua ma Israelu ona faamau lana pule ia Kanana, leaga e saili i le malosi, o le tao ma le pelu ma le talipupuni. O le ala lea na ui atu ai le malosi o le Atua ia Iosua ma Israelu, ao le auupega sili lava la e tatau ona tamau ai pea Israelu o le **faatuatua ia moni ma faamaoni**.

Ae malie aua o le ala foi o Israelu i Kanana, e ui atu i totonu o nisi nuu lea na amata atu ia Ieriko. Ae maimau e pe ana mafai ona pei o tatou e mafai ona soalaupule ma faia i le va fealoaloai. Aua e mafai lava ona faanoi fofoga - *sei matou ui atu a i le tou fanua...* I le aotelega la i le tusi o Iosua ma le agai atu o Israelu i le nuu folafolaina. E le o se galuega e faigofie, o le galuega e manaomia ai le **tumau o Israelu i le Atua**, leaga o le polokalame a le Atua lea e fai ma taitai tama. O le mea moni e mafai ona faapea i le agai atu o Israelu i Kanana ua na o se **sui momo'e**, a o le Atua o le a ia tau le taua mo Israelu.

**FAAMOE MOE:**

O le igoa Iosua e uiga tutusa ma le igoa Iesu – O le Atua e faaola mai (God saves). O iina foi o lo o faamalumalu mai ai se faamoemoe taua o lo o galue mai ai le Atua i lona nuu o Israelu. O le alofa fai paaga o le Atua ma Israelu, lea na le gau ai le tao ma agiagia pea le fu'a o le manumalo ia Israelu i le malosi faafitafita. O lea lava e tumau le feagaiga **o le Atua mo Israelu**,

peitai e tatau foi ona **Israel mo le Atua**. E faaola e le Atua lona nuu pe a tumau lo latou faatuatua faamaoni.

### **NISI O A'OA'OGA A IOSUA:**

#### **1. Taunu'u folafolaga (God fulfill his promises)**

Ua lagomau i tiasa Tamā sa tuu fofoga i ai e le Atua le folafolaga i le nuu e tafe ai le suasusu ma le meli (Kanana). Tuanai le faigamalaga sa a'e i le mauga ma ifo i le vanu, fia aai ma fia feinu, tua i le tomuu ma le faitio. A o lea ua vavala ata o ta'u leleia ma ua iite fanualalo ina ua vaaia atumauga ma laufanua o Kanana. Le Atua faamaoni lea, lea ua molimau ai Iosua, e le gata na faalogo ai ona taliga a o lea ua vaai tino ona fofoga i le taunuuga o le folafolaga.

#### **2. E tau le Atua mo ona tagata faatuatua (God fights for His people)**

O le tusi lava ia o Iosua i se manatu faigofie, o le tusi o taua(war). O le faatofalaiga o le toto masaa sa feutana'i ai Israuelu ma le tele o nuu sa nonofo i Kanana. O le feau a Iosua, e le o se malosi tulagaese ma se atamai faa-militeli ia Israuelu. A o le fa'aalia o le **mana silisili ese** o lo latou Atua moni. Aua se a ea se malosi o le soona leo tetele o leo o pu e afua ai ona toulu i lalo pa malolosi o Ieriko??(Ios 6:1-21) O ai foi ua fai ma taitai au ia Iosua ma Israuelu??(Ios 8:1). A o ai foi ua na mafaia ona faa-tumau le la sei tumau le taimi e tau ai le taua??Ua na o le Atua ma lona malosi ma le silisili ese.

#### **3. E tauia le agasala (Sin will be punished)**

O le gagana a le atunu *e ifo a le fuiniu i le lapalapa*. O le mataupu e 7 o lo o manino ai le Atua e i ai lana faamasinoga amiontu mo le tagata. O lo o faamauina le agasala a Akana ma le taui na tuu iai e le Atua. O le faamoemoe tupito lea o lo o naunau ai le Atua mo lona nuu. Ia ola usitai i tulafono aemaise ia tausisia lo latou fai paaga pea ma le Atua. O le fa'aalia o le faamasinoga amiontu a le Atua ia Akana, e le'o le tetee ia Israuelu po o Kanana. A o le tetee i le ola agasala ma le le usiusitai o Israuelu.

#### **4. Auaunaga mo le Atua. (Serve the Lord).**

Manino i upu faafeiloai i le Tusi o Iosua le fesuiaiga o nofoa o auauna e toalua. Ua oti Mose ae seei ane Iosua. O le auaunaga a Mose ua fa'aauau e Iosua – a o le avea ma auauna o le ave atoa lea o le malosi ma le ola e faaaogaina ma mea faigaluega e galueaina ai le finagalo o le Atua. “....*Ina filifili ia outou i le aso nei po o ai tou te auauna i ai, po o atua sa auauna i ai o outou tama, o e sa i le la itu o le vaitafe, po o atua o sa Amori,,,a'o a'u nei ma lo'u aiga matou te auauna i le Alii*”(Ios 24:15)

---

**ASO SA:**

**05 NOVEMA 2023**

**MATAUPU:**

**TAMAFAI A LE ATUA/FILIFILIGA O ISRAELU**

**Tusi Faitau:**

Roma 9: 1 – 13

**Faatinoga o le Mataupu:**

- E taua le faamalamalamaina o le uiga o le upu Tamafai i le mafaufauga faa-Samoa

- Ia vaevae le Autalavou i vaega e Lua
- Ona suesue lea o le isi vaega i le va o Israaelu ma le Atua faa- Tama fai
- Ae suesue le isi vaega i le va o le Keriso toetu ma le au Kerisiano o lo o i le Ekalesia i Roma

### Fesili Vaega 1

1. O ai na tupu mai ai Israaelu, a o le a foi le faamoemoe o le avea ai o Israaelu ma Tama Fai a le Atua?

### Fesili Vaega 2

1. O a ni taiala o lo o a'oa'o ai le Aposetolo ina ia atagia ai le avea ma Tamafai mo le Keriso toetu?

### **FESOASOANI MO LE TAITAI**

O Israaelu o le nuu filifilia o le Atua i le Feagaiga Tuai. Ae a to manatu i le a'a na tupu mai ai Israaelu. Na tupuga mai ia Aperaamo...Aua o lenei le upu na folafolaina – *E faapena i lena tausaga, ou te sau ai, e maua foi e Sara sana tama tane.*

O Isaako o le tama na fanau mai i le toala fanau o Sara, a'o le tama o le folafolaga. Na ataata Sara aua e na te lei mautinoa e na te toe fanaua se tama tane, peitai o le finagalo lava o le Atua. O lona uiga o Isaako o le tama na folafola mai e le Atua, fa'aaogaina ai Sara. A o Isaako lea na tupuga mai ai Israaelu filifilia. O le tama moni a Sara, a o le tamafai i le Atua. O Israaelu o le nuu na filifilia e le Atua e ala mai ai le faaolataga mo le lalolagi.

O Israaelu i le Feagaiga Tuai a o Iutaia i vaitaimi o le Aposetolo ma le feagaiga fou. E le'i faigofie le Tala Lelei i le Ekalesia a Roma ona o le malosi o sauaga ma le pule faa-emeperoa. Sa alu faalilolilo le Tala Lelei leaga a maua se Kerisiano, o lona iuga

lava o le ot. Peitai e lei avea le faamalumalu o ia sauaga ma ala e maluia ai le Tala lelei. O sauaga ma mea faafefefefe ua le tāua lea i manatu o Paulo. Lea la e faamalosi atu ai Paulo i le Ekalesia, ina ia latou manatua lo latou faasinomaga. O latou o tagata ua filifilia e le Atua ina ia faailoa le Tala Lelei i le lalolagi. Ae le o se mea fo'i e faaleaoga lo latou tautīgā ma le taumafai pea ina ia tuu a'e i luga le lamepa o le Tala Lelei.

Ua tautala Paulo o le tagata ua ia silafia lelei lona tulaga ua i ai i le Tala Lelei ia Iesu Keriso, O ia o le Tamafai a Keriso i le Tala Lelei, O lona sootaga e mimita ai i le Tala Lelei, peitai o le alofa faamaoni o Paulo i ona uso a tamafai i le Tala Lelei, ina nei motusia lo latou gafa e tau i le niusina.

O le upu **anatema** o lo o taua i le f3 o le faaliliuga o le upu Eleni o lona uiga o le soloieseina..O le upu lea sa fa'aaogaina e Mose ina ua faia e Israaelu le povi auro. Na foi ane Mose ua ifo le nuu i le povi auro, ona faatoga lea o Mose i le Atua ina ia alofa ma faamagalo lona nuu filifilia, ae afai e le mafai ona soloieseina lea o lona igoa mai le tusi o le ola. O lona uiga o le naunau o Mose ina ia ola le nuu o le Atua. E faapena le agaga lea e tupu i manatu o Paulo i tagata Iutaia o lo o i le Ekalesia i Roma. Ana mafai ona soloieseina o ia ae avatu ai ona uso ma ona aiga i la le tino i le tala lelei. O lo o faatatau lea i tagata Iutaia o lo o i ai i totonu o le Ekalesia.

O le faamalosi atu a Paulo i le Ekalesia, ina ia manatua lo latou sootaga vavalalata ma le Keriso Toetu. O le filifilia o Israaelu i le amataga, ma avea ai ma Tama Fai i le Atua. O lea lava e faaauau lea sootaga. O le avea o Israaelu ma Tamafai i le amataga, o le sootaga na amata mai e auga tamā ma faasolo mai ai lava, lea e tupu mai ai le Alii Faaola o Iesu Keriso. Lea ua taunu ai le faaolataga o le faamoemoe o le filifilia o Israaelu. O le Tala Lelei lena lea e molimau ai le loto fuatiaifo i le Agaga o le Aposetolo. O le tagata sa fai ma tamafai o le pule sau, a o lea ua avea ma tamafai o le Tala Lelei iā Iesu Keriso.

O le faamalosi foi lea mo le Autalavou. O tatou o Tamafai o le Tala Lelei. O tatou o tagata o le aiga o le Tala Lelei ia Iesu Keriso. O le faiā ua tau ai lo tatou gafa i le niu sina. Faapei ona filifilia o Isarael i le amataga, e faapena foi ona muai filifili ia i tatou auā le Atua ma lana Tala Lelei. O le filifiliga ua avea ai tatou ma e faailoa ma faia lona finagalo i le Tala Lelei. **O sa Isaraelu i latou, o tamafai i latou, ua i ai foi le mamalu, ma feagaiga ma sauniga, o le tulafono ma le tapuaiga, ma upu na folafolaina....**

Ioe e faapena foi le agaga ua ia i tatou – O le avea o tatou ma Tamafai, o le i ai lava foi lea o le mamalu o le Atua ia i tatou. O le sootaga e tatou te ola ai i le alafua o le feagaiga i lo tatou va ma le Atua. Le afuaga foi lea o lou soifua talavou, ae a tulafono ua lima taitaina ai lo tatou ola i aso uma.

.....

**ASO SA:**                   **12 NOVEMA 2023**

**MATAUPU:**               **FAATOSINA LE TAMAOAIGA (Tupe)**

**Tusi Faitau :**           1 Timoteo 6:1-10

#### **Faatinoga o le Mataupu:**

- Ia fetufaai le autalavou i le aogā o le tupe ma le tamaoaiga, a o a foi ni itu e le lelei ai.
- Ona vaevae lea o le Autalavou i vaega se lua, ona faia lea o se faatalanoaga o nei vaega.
- O le isi vaega e latou te faatalanoa ni itu e lelei ai le tupe, a o le isi vaega e faatalanoa ni itu e leaga ai le tupe.

#### **Manatu mo Le Taitai ina ia faalautele ai le Mataupu i le Tusi Faitau:**

O lo o ua tatou iai nei i le faana'e mai o le tai o suiga tetele...Ua le toe taulia ai le aumai o le maukeni ae avatu le meleni, e faafesuiai ai le tamai povi ola ma le meaituaolo lapo'a. A ua fai ma tusipasi o manaoga le tupe. Lea la ua tatou faimalaga ma tietie i le pasi o lo o faafoefoe e le tamaoaiga..Ua ilo le malosi o le tupe, leaga o le ala lea e goga ai si toeaina ma si loomatua,,,pe a leai sana tupe i le ato...E atu foi le mafaufau ma pei e ita pe a leai se tupe. E vaivai ma faaausē le tagata malosi pe a leai se seleni. E taofia uma lava foi fuafuaga ma faatatauga pe a leai se seleni...Ae a la pe a maua se seleni?

O isi ia mea e lua o lo o taufetuli faatasi i totonu o le lotoifale o Efeso o lo o galue ai Timoteo. O le tamaoaiga ma le Tala Lelei ia Iesu Keriso. Ua tau talafeauga ai foi ma o tatou foi lotoifale. E le o manatu Paulo o se mea le aoga le tupe, leaga o faailoilo ia e iloa ai faiva alofilima ma le soifua saili o le tagata. Ae a le soifua tausili o matua e fa'aaooga fanau...faamoemoe lea...Peitai o le manatu o le Apostolo ina nei alu atu le tupe tulei ese le tulaga o le Atua.

Tomua i upu a Paulo,,*o e o i lalo o le amo a le pologa..*O le pologa ma lona matai,,ae afua ona i ai le pologa ona o le tamaoaiga. Ua faatau mai le pologa e galue e aunoa ma se totogi. A o le faamalosi lea a Paulo,,afai o i lalo o le amo a le pologa, e tauia e le Atua ina ua e faamaoni ma usitai i le matai. Leaga o le amo a le pologa o lo o amoina ai le manua o le Tala Lelei ia Iesu Keriso. E tauia le manua o le matai e tauia foi le amo a le pologa. E faapena foi i le matai faatuatua, ua avea lona tulaga faataitai e momoli atu ai A'oa'oga o le Tala Lelei, ina ua pule ma le faatuatua ma le alofa...O le agaga maualuga i manatu o Paulo – ua tutusa tagata uma i le silafaga a le Atua. O le Atua e na te faaoso lona la ma faatoto le ua i le tagata pologa ma le tagata

mauoa. O lona uiga e le o le tamaoaiga, ao le Atua e afua ai ona maua le tamaoaiga.

O nisi o faafitauli o lo o tautala ai le Aposetolo - **Aua o le manao i tupe, o le pogai lea o mea leaga uma lava, ua mananao tele iai nisi, ona sese ai lava lea oi latou i le faatuatua**” auā o nisi ia o vaivaiga o le soifuaga nei...E momoo ma faapea ifo..E ta fia tietie i se taavale fou,,ta fia maua sota fanua i fea....O faatosina ia o le tamaoaiga, ona foliga mai lea e le leaga le tamaoaiga ae mafua ona o le manaonao fua, manao tele..ona pei ai lea ua e faatuatua i le tamaoaiga ae galoo ai loa le Atua. A o le uiga lea o le tatalo na aoao mai e lo tatou Alii...*Ia e foai mai ia te i matou mea e tatau ma le aso*,,O a mea tatou te maua i lea aso – o le foai lena a le Atua ua tatau.

O a mea ua maua i lou soifua ma lo'u nei ola, o le foai a le Atua. Pe lalo o le amo a le pologa pe saofai i le pule a le matai. O tofiga e tutusa lona taui i luma o le Atua. O a mea ua tatou maua, o le vailaau taua o le fiafia,,fai mea fiafia....

Tatou fai mea fiafia, ua eseese uma tulaga o lo o i ai tatou. O e ua malolosi ma e ua feololo ma e foi lima vaivai. E na ona eseese i le ola nei, a o le silasila mai a le Atua e tutusa uma tagata i le ola faamaoni ma le faatuatua.

Ia tatou talia ma le Agaga maualalo le foai ua aumaia i lea aso ma lea aso. Aua foi tatou te faapea ifo ta fia pei.....ta fia pei,,,A o a foi se tamaoaiga ua i ai, ia lagona le Agaga faafetai ma ia faamuamua pea le Atua. Fai mai Paulo – “*Auā tatou te lei aumai lava se mea e tasi i le lalolagi...., ua mautinoa foi tatou te le mafai ona aveese ai o se mea..*”

---

**ASO SA:** **22 NOVEMA 2023**

**MATAUPU:** **E I AI LE FAAMOEMOE O LE ATUA  
MO SO O SE TAGATA**

**Tusi Faitau :** Kenese 21: 8 – 21

### **FESOASOANI MO LE TAITAI:**

Isamaeli o le ulumatua a Aperaamo, le ala lea na tau ai lona gafa i le niusina o manuia *O le tama foi a le fafine pologa ou te faia o ia ma tupuga o se nuu*. Na osofa'i e lagona o le le fiafia Sara, ona mamae ai lea o le mafanafana o le mafutaga. Faimai Sara ia Aperaamo, ina **tuli ese** ia o lena fafine pologa ma lana tama. Ae faimai le molimau a Kenese. Ua tuu atu foi le tama ua **aueseina** o ia, ona alu lea o ia ma feseai i le vao o Peresepa.

Upu ia e lua e fia tuliloa – **tulieseina ma le aueseina**. Sei tau eliel pe aisea ua le faaaogaina ai se upu se tasi. Ae pe i ai foi se eseesege o le tulieseina ma le aueseina.

O le tulieseina o lo o fa'aaogaina e Sara agai ia Akara ma lana tama. O le upu eperu o le garash faaperetaniaina to cast out. outcast..O lona uiga e pei o tagata mamai lepela ua tulieseina e nonofo i tuapa. O le o ese e aunoa ma se taunu i se taunuuga lelei. O le tuli ese e uiga tutusa foi ma le tete'a a le ulugalii, ua le toe fia mafuta le isi i le tasi. Ua soloia le aufuefue o le tama o Isamaeli i manatu o Sara.

**O le aueseina** i manatu o le Tusitala, O le upu Eperu o lona uiga o le auina atu..to send out. O le auina atu lea o lo o fa'aaogaina i le auina atu o le auso'o e talai le Tala Lelei. O le aueseina la o le auina atu e alu e i ai le faamoemoe lelei o se galuega o lo o fia faatino. O le aueseina ai la o Isamaeli o lo o i ai le faamoemoe lelei mo ia o lo o taoto i le lumanai.

E pei e foliga mai – i le va o Sara ma le tama ua matua tulieseina, a o le silasila mai a le Atua ua na ona aueseina, ae o lo o lupe le faamoemoe lelei ma le manuia mo ia i le lumanai.

O le faamoemoe foi lea o le avea ai o tatou ma tama ma teine talavou. O lo o i ai le faamoemoe lelei mo tatou o lo o taoto i le lumanai. E le finagalo le Atua ina ia tatou i Tanumalala ma nisi o nofoaga o lo o i ai le ola pologa. Ia tatou ola pea ia Keriso e manuia ai.

-----

**ASO SA:** **29 NOVEMA 2023**

**MATAUPU:** **FAAFINAUGA(Debate)**

**ULUTALA O LE FAAFINAUGA :**  
**E AOGA TELE FONI I FANAU?**

#### **Faatinoga o le Mataupu**

- ✓ Ia vaevaeina le Autalavou i vaega e lua
- ✓ O le itu tetee ma le itu e lagolagoina le ulutala
- ✓ Ia taitoatolu i vaega nei e lua
- ✓ Ia faamasino le Faafeagaiga
- ✓ Tofi ni taitai o vaega taitasi
- ✓ Tuu se lima minute e faasoa ai vaega ae le i amatalia le faafinauga

#### **Aotelega:**

- Lafo atu pea i lau susuga i le taitai, e taofai manatu o le faafinauga.
  - Ua le toe tau faailoaina le i ai o itu e aoga ai le telefoni, ma nisi foi o itu ua avea ma vaivaiga i nei ona po
- .....

**ASO SA:** **3 TESEMA 2023**

**MATAUPU:** **O LE MEA E TE FUAINA ATU E TOE FUAINA MAI**

**Tusi Faitau:** Galuega 5: 1 – 11

- Tasi lenei o mafaufauga ua silafia lautele, o lo o manino i le Tusi Faitau
- O a ni mea sa fuaina atu e le ulugalii o lo o i le tala
- A o a foi ni mea na fuaina mai

#### **Faatinoga o le Mataupu:**

- Vaevae le Vaega i vaega e lua, o le isi vaega o Anania, a o le isi vaega o Safaira
- Vaega a Anania: Ia faasoa le vaega po o a ni tiute sa tatau ona faatino e Anania ina ia aua nei tupu mai se faafitauli
- Vaega Safaira : Ia faapena foi ia Safaira, ia fetufaaip o le a se fautuaga ma se gaioiga sa tatau ona fai e Safaira

#### **MANATU MO LE TAITAI:**

O le fua lea ua fuaina atu e lenei ulugalii, ua la fa'aaoga i tupe o le lotu. Na fesiliglia e Peteru le Apostolo po o fea uma tupe o le tau o fanua o le lotu. Peitai, sa pelogia e lenei ulugalii le Apostolo e la te le o fa'aaogaina se tupe. O le isi vaega faanoanoa, ona ua autasi lenei ulugalii fai e lenei pepelo. O lona uiga, ua faatonuina e Anania lona toalua ina ia aua nei tautala i le tupe o fanua ua la fa'aaogaina. E le o se amio lelei lea amio, aua sa tatau ona fautua malosi le tinā o le Aiga i lona toalua i se mea sese ua faia. O uiga ia o le manao tele ma le malosi o le oa e taufaasese i le tagata.

## **Vaaiga Faalotoifale:**

1. Ia faamalosi lau Susuga i le Taitai i le Autalavou ina ia faamaoni i le faatinoina o o latou tiute aua e mautinoa lava e toe fuaina mai i se taimi o i luma.
2. Ua i ai foi aulotu ma faalapotopotoga ua malepelepe ona o le le faamaoni o e ua vaaia mea tau tipe.
3. Ua tele foi tupulaga ma e atamamai o lo o i Tanumalala ona o le faatosina o le manao i tipe.

Ia manuia le faasoa.....

.....

**ASO SA: 10 TESEMA 2023**

**MATAUPU: O MARIA MA LE TAPOU**

**Tusi Faitau:** Mataio 1: 18 – 23

## **FESOASOANI MO LE TAITAI:**

### **Faatinoga o le Mataupu**

- Ia faitau faatasi le Tusi ua filifilia
- Ia faamalamalama e lau Susuga i le Taitai le uiga o le Taupou i le Faa-Samoa

### **O le a le uiga o le Taupou?**

O le upu taupou, i le aganuu a Samoa, o se tamaitai e le i faia sona aiga (toalua), e telē le taua o le tiute o le taupou i totonu o aiga ma nuu, o i latou e paluina le ava pe a fesagai nuu ma ni malo, e le pule lava ia i ana mea e fai, o le taupou e vaavaai tele, o le ala lea

a oo ina tofale se tamaitai e lei faia sona toalua, e faasala e le nuu, aua foi ua faoa le mamalu, sa faamamalu ai e lona aiga ma le nuu.

Sa faapena foi le tamaitai o Maria, e ui sa ia faufautane pe sa manao ia Iosefa e fai ma ona toalua, peitai o ia lava o le taopou. E atagia mai i le molimau a Mataio, o le taimi lea o lo o feoai Iosefa ma Maria e lei nonofo lea ua faamanuia ai o ia, i le to, o le to lava mai le Agaga Paia. O Maria o ia lava o le tamaitai na filifilia e le pule tutasi ma le pule aoao a le Atua e ala mai ai lana faaolataga. O lagona faaletagata o Iosefa na ia faapea ane ai ma manatunatu i lona loto, e na te le faamaasi i Maria i luma o tagata o le a ia faatea lemu, o lona uiga o le a taumafai e faagalagalo, aua o mea faapenei o se luma i se aiga. Peitai a o manatunatu Iosefa, ae fa'aali mai loa ma le agelu a le Alii i le miti, ua faapea mai: Iosefa e, le atalii o Tavita, aua e te fefe ina au mai ia te oe o Maria lau ava, aua o lana to mai le Agaga Paia.

E fanau mai e ia le tama tane, e te faaigoa foi ia te ia o Iesu, o le uiga o le igoa o Iesu: O le Faaola, auā e faaola e ia lona nuu ai a latou agasala. O i foi lea ua taunu ai le valoaga a le perofeta o Isaia. “Faauta e to le taupou ma fanau mai le tama tane latou te faaigoa foi ia te ia o Emanuel o lona uiga: Ua ia te i tatou le Atua. Na filifilia e le Atua Maria ma Iosefa ona o tagata loto maulalo, o tagata amiontonu e ala mai ai lana faaolataga i le lalolagi. O Maria o le tinā o Iesu, o le pepe o le Kerisimasi, o le faaola o le lalolagi. O le taupou o le faailoga o le mama (purity)

Ia avea o tatou Talavou ma Taupou e ala mai ai le finagalo o le Atua...

Ia manuia tele le Kerisimasi ma le Tausaga Fou.

.....